

84/2Poc = Караб Кара: 6497

148

Депшокълаки Узейрни джамии Хусеин



# АКЪ КЁГЮРЧЮНЛЕ

Лепшокъланы Узеирни джашы Хусеин

# АКЪ КЁГЮРЧЮНЛЕ

Лирика назмула къарачай тилде

Черкесск шахар  
2014

ББК 84(2Рос.Кара)6-5  
Л48

**Рецензенты:**

Кулина Абул-Керимовна Салпагарова, член *Союза писателей Российской Федерации, заслуженный работник образования КЧР, старший преподаватель карачаево-балкарской и ногайской кафедры института повышения квалификации учителей;*

Зубайда Айгуфовна Узденова, *старший преподаватель карачаево-балкарской и ногайской кафедры института повышения квалификации учителей в г. Черкесске*


Л48    **Лепшоков, Х. У.** Белые голуби: лирические стихи на карачаевском языке / Х. У. Лепшоков. – Черкесск: Нартиздат, 2014. – 204 с.

ISBN 978-5-906148-08-7

Хуссин Лепшоков – народный поэт Карачасво-Черкессии, автор 12-ти книг. Он относится поэтам, чьи души тонкого лирического склада. Хуссин Узеирович служит прекрасным идеалам чувства любви и дружбы, верности, честности, порядочности, добра, справедливости и красоты. В нём горит звезда любви ко всему живому.

В своей новой книге «Белые голуби», которая состоит из 101-го стихотворения, поэт воспевает верную, прекрасную, горячую, настоящую любовь.

Книга адресована широкому кругу читателей.



ББК 84(2Рос.кара)6-5

Кара, 6424

© Х.У. Лепшоков, 2014

© ИКО «Аланский Эрмитаж», 2014

© ООО «Нартиздат», 2014

ISBN 978-5-906148-08-7

## Лепшокъ улу Хусеинни суймеклик лирикасы

### «Акъ Минги Тауну эни...»

Суймекликни темасы бек эртделеден бери да джырланы, джомакъланы, таурухланы, тауранланы, хапарланы къурашдырыуну тамалы болгъанды. Бурунгу поэтле суймекликни юсюнден кёб джазгъандыла. Суймекликни хакъындан Шекспирни, Дантени, Петрарканы джазгъанлары дуниягъа махтау бла джайылгъандыла. Онтогъузунчу ёмюрде – Эресейни адабиятыны Алтын ёмюрюнде – дуния адабиятны байлыгына орус поэтлени джазгъанлары кёо-шулгъандыла. Андан бери да орус лигератураны классиклерини джазгъанлары дунияны поэзиясында эм магъаналы орунланы бирин аладыла.

Къарачай-малкъар фольклорда эмда къарачай литературада да суймеклик темагъа уллу эс бёлюнеди. Къарачай-малкъар фольклор поэзияда суймеклик джырла, ийнарла, суймеклик чам ийнарла бек кёбдюле. Белгили шайырла Къочхарланы Къасботну, Семенланы Исмаилны суймеклик джырлары классика чыгъармаладыла.

Бусагъатдагъы къарачай назмучула, шайырла да суймекликни юсюнден кёб джазадыла. Аланы бири Лепшокъланы Узеирни джашы Хусеинди.

Лепшокъланы Хусеинни аты окъуучулагъа иги белгилиди. Хусеин иги чыгъармачылыкъ иши ючюн 1999-чу джыл РФ Журналистлерини союзуна, 2002-чи джыл Россия Федерацияны Джазыучуларыны союзуна членнге алыннганды. Къарачай лигератураны айнытыугъа иги юлюш кёошханы ючюн, 2010-чу джыл анга Къарачай-Черкес Республиканы Халкъ поэти ат аталгъанды.

Лепшокъланы Хусеинни чыгъармаларында къарачай халкъны, Ата джуртуну аламат табигъаты туудургъан сейир макъамлылыгы танылады. Хусеин кесини чыгъармаларыны юсю

бла к̄арачай поэзияны дунясын, терк айныб баргъан миллет адабиятны жанрыны джетишимлерин фахмулу к̄ергюзалады.

Хуссин быллай назму эмда проза китабланы авторуду: «К̄егюрчюн уя», «Джулдузла джанадыла», «Сууаблыкьны джолу», «Кавказ – к̄арнашлыкьны, шохлукьну джурту», «Эльбрус, я – снежинка твоя», «Дивный край», «Дорога праведности», «Изумруды Эльбруса», «Сияние сердец», «Аллахны атлары», «Джашауну айланчларында», «Тазаланыу». Аны назмулары «К̄арачай поэзияны антологиясы», «Поэзия народов Северного Кавказа» деген китаблада басмалангандыла.

Лепшокъланы Хусеинни назмулары к̄б тюрлю темагъа джазылгъандыла. Алада философия – намыс магъана теренди. Хусеинни чыгъармаларыны баш темалары Ата джуртха суймеклик, к̄арачай-малк̄ар миллет адетлеге таяна, тин, намыс джаны бла адамны айныуу – ёсюую, суймеклик лирика айырылыб кенг орун аладыла дерге тыйыншлыды.

Хусеинни суймеклик лирикасы магъана джаны бла байды, назик сезимлиди, тынч ангылашынады, к̄б тюрлю суратлау мадарла таб, уста хайырланды-рылыб, назмулагъа аруу, энчи макъам береди. Алада автор суйген адамыны джюрегини назик тебиулерин к̄ергюзеди.

Назмучуну суймеклик поэзиясында к̄уру лирика персонажны суймеклик туудургъан керпеси, к̄ууанчлары бла к̄айгъылары тюр, поэтни кесини сезим дунясыны халы да танылады. Поэт адамны тин дунясына, аны т̄егерегиндеги болумлагъа, аланы бир-бирине к̄алай тийишгенлерине да уллу эс б̄ледди. Аны бла бирге назмулада авторну кесини оюмлары бла джюрек к̄айгъырыулары, сезимлери уллу орун аладыла. С̄з ючюн, «Акь к̄егюрчюнле» деген китабдагъы 101-ден к̄уралгъан назмуланы атлары аланы магъаналарын терен, аруу ачыкълайдыла! «О, суймеклик», «Суймекликни хазнасы», «Суймеклик джырыса джюрегими», «Суймлю к̄езле», «Джулдузла джанадыла», дагъыда аны кибик. Эки бетлиликни, джалгъан сезимни унамагъан, ётюрюкню, сансызлыкьны,

сатлыкълыкны не аз да унамагъан керти, таза суймекликни белгисиди акъ кѣгюрчюн, «Акъ кѣгюрчюнле» китабха аты аталгъан назмудагъы акъ кѣгюрчюн. Назму лирика герой былай айтады:

**О, суймеклик! Чолпанда кѣрюнесе,  
Сен Айны кюмюшюне бѣлюнесе.  
Тюзлюк, кертилик сен сайлагъан джолунг,  
Сууаблыкъ ишлейди чомартлы къолунг.  
(«О, суймеклик!»)**

Лепшокъланы Х. адамны сыйын кѣлтюрген, адамлыгъын айнытхан, адеб-намыс ангысын ѳсдюрген, иннетин, джюрек сезимлерин тазалагъан, джу-мушакълыгъын, асыллыгъын тирилтген сезимнича суратлайды суймекликни.

**Суймеклик багълатад адамланы,  
Ашхылыкъ орналыб турурун излейд.  
Хурметин тѣге, джарытад тауланы,  
Ол мамыр джашауну джарыгъын теджейд.  
(«Аулайды бютеу Аламны») –**

деб джазады Хусеин суймеклик адамны халисине тийишгеннини, аны джюрегин джарытыб, адамлагъа ашхы оюмлукъну бергенини юсюнден.

Хусеин суймекликни юсюнден джазылгъан назмуларында ингил, назик мыдахлыкъ, джумушакълыкъ, суйюне билмеклик, терен, таза сезим, тиширыуну ариулугъун кѣре, ангылай билиу, сейир суймеклик суратланады. Ол назмулада автор гаулу тиширыуну ашхы, асыл адамлыкъ шартларыны джашау магъаналарыны юсюнден кѣб оюм этеди, алагъа уллу сый, багъа береди. Аны юсюнден бир назмуда:

**Сени джюрегинг игиди,  
Тазады джанынг, хурметинг,  
Акъ Минги – Тауну эниди  
Адамлыгынг, тюз иннетинг, –**

«Къарачайны таулу къызы» назмусунда джазады.

Бу сёзле 1404-чю джыл Персиядан келген джолоучу архиепископ Иоганн Голанифонтибусну къарачайлыланы юслеринден джазгъан «...имеют свой собственный язык, свою письменность... Их женщины прекрасны и мягкосердечны...», – дегенин, аны кибик, бурунгу джолоучуланы, тышындан келиб кетген алимлени къарачайлыланы (аланланы), аны ичинде тиширыуланы юслеринден джазгъан махтау, уллу сый бериу сёзлерин эсибизге тюзюредиле. Ата-бабаларыбызны ол уллу сыйларын багъалата, миллетибизни сыйын мийик тута, ала бизге къоюб кетген тин байлыкъны, сейир, ашхы адеб-намыс джорукъланы, асыл хали шартланы юсюбюзде сакъ тутаргъа, аланы седиретмей сакъларгъа кереклисин эсгертеди.

Хусеинни суймекликни юсюнден назмуларында энчи макъам, джангы ауаз билинесди. Тиширыуну сыйлы, суйюмлю сыфагы поэтни поэзияны мийигине бекден бек тарта барады.

**Сени иннетинг тазад,  
Акъылынг а, джарыкъды.  
Фахму къаламынг джазад,  
Сезиминг къууанчлыкъды.  
(«Мениге къууанч бересе»)**

Поэт огъурлу, оюмлу, назик сезимли, сабыр, терен намыслы, тегерегиндегилеге насыб джылыу берген тиширыугъа махтау, сый береди:

**Сенде джашайд игилик,  
Джолуму джарыггаса.**

**Юйюрсюннгенд тирилик,  
Мийикден кьаратаса.**

**Сени татлы ауазынг,  
Булбул джыргъа ушайды.  
Ариулугъунг, чырайынг,  
Джюрегимде джашайды.**

**(«Меннге кьууанч бересе»)**

«Джашау байлыгъым», «Сюймекликге хорлатдым» назмуларында сюймеклик темагъа кече, адамны энчи насыб-сюймеклик да излерге, насыбны кьурай, тута, джакълай, сакълай билирге эркинлиги эмда борчу болгъанын эсге салады. Аны сюймеклик поэзиясында ол сый, махтау берген таза, ингил сюймеклик лирика геройгъа таркъаймазлыкъ сезим кьарыу, джюрск джылыу, тюзлюк кьууум, джумушакъ джюрск тазалыкъ бергени кёргюзюледи.

**Хурметинг Къанатларың, кьушча, керсин,  
Адебни, намысны хазнасы келсин.  
Сыйыңг джайылсын мийикге, кенгнге,  
Адамла кёб алгъыш айтсынла сеннге.**

**(«Сыйыңг джайылсын кенгнге»)**

Лепшокъ улуну лирика героюна суйгенини назик сыфаты бек багъалыды. Ол сыфат аны джолун джарытады, бютеу джашауун, талпыуларың кесине тартады. Аны юсюнден поэт быллай джазады:

**О, нюзюрюм, бек багъалым,  
Сенсе, джаннауум, тамалым.  
О, акъкъанат кёгюрчюнюм,  
Сенсе, кьууанч берген кюнюм.**

**(«Кюнюм, Айым»)**

Лирика герой эм таша джюрек сырын, талпыуларын, муратларын сынгар суюгенине ышанады. Суюгенсиз джашауну толу магъаналы, джарыкъ джашаугъа санамайды. Аны себеби – ол муну джарыкъ джашаугъа къанатландырады:

**Атайма джашау джырымы сеннге,  
Къанат бергенлей тураса меннге.  
Таукел чакъыраса, булгъайса сен къол,  
Алыб барады суюмекликге джол.  
(«Мени чакъыраса»)**

«Таукел чакъыраса, булгъайса сен къол», – деб автор «сен мени суюмеклигиме огурайса, мени джюрек талпыуларымы ангылайса», – деген магъананы билдиреди.

Лепшокъланы Хусеин бусагъатда чыгъармачылыкъ фахмусуну чакъгъан кёзюуюндеди, урунуу джолуну мийик ёрюндеди, поэтик иши бла кёб кюрешеди. Ишексиз, джангы чыгъармалары бла окъуучуланы, поэзияны суюгенлени алкъын кёб къууандырыр, деб ышанабыз. Нек дегенде, ол заманны терен сезеди, джюреги аны бла бирге тебеди. Джазычу къаламы джитиди, чыгъармачылыкъ оюм тереги кёб тюрюлю бутакълыды, джангылыкъ сезимлиди. Ол себебден поэзиясы да заманны излемине келишеди, энчи шартлыды. Аны назму тили байды, суратлау мадарлары кёб тюрюлюде, чыгъармаларында тамаллы, баш оюм – адамны хатерлиликке, джумушакълыгына, кенгджюреклиликке, иннет тазалыгына, мамырлыкъны джорукълары бла джашай билгенине сый, махтау бериудю, миллетибиздеги ол асыл хали шартланы багъалатыу адетлени седиретмей сакъларгъа тырмашыуду. Аны ючюн болур аны поэзиясыны кимге да иги ангылашынганы, кесин суюджюргени. Джарыкъ джашаугъа къанатландыргъан поэзиясы, Хусеинни сёзю керти устасы болгъанына шагъатлыкъ эте, окъуучуланы кесине тартады, оюм гёзеннге кийиреди.

Фахмулу сѣз чемерлени – поэтлени чыгъармаларыны себеби бла уллу, магъаналы культура сезимлеге джанаша, аланы джюрск сезимлерин ангылай, биз – окъуучула – сезим дуниябызны байындырабыз. Эслилигибизни, мамырлыкъ ангыбызны, тюзлюк къууумубузну, джашау талпыуларыбызны, кылыкъ-хали шартларыбызны асыллыгъын айнытабыз, байындырабыз. Бу затла уа бусагъатдагъы рационал заманнга айырылыб бек керекдиле. Хусеин къарачай тишырыуну джюрегине «Акъ Минги Тауну эниди» дегенча, къарачай поэтлени ашхы назмуларында ол эн болгъаны хакъ болур, эшта. Хусеинни поэзиясында да ол эн барлыгъы хакъды.

**Мамчуланы Фатима,  
Къарачай-Черкесияны «Знак Почета»  
орденли гуманитар тинтиулени  
институтуну адабият эмда фольклор  
бѣлюмюню илму къуллукъчусу,  
филология илмуланы кандидаты**

## Ариулукъ

Ёмюрледен бери да суймеклик эм баш темаланы бирине саналганлай келеди. Аны юсюден акъыллы философла, фахмулу поэтле, джазыучула, алимле эмда башхала джазганлай тургандыла. Ол сейир сезим адамны джашауун джылы, багъалы этеди. Игилик, тюзлюк, шохлукъ, мамырлыкъ, ариулукъ башха ашхылыкъла анда уяланыб турадыла. Суймеклик болмагъан джерде насыб да джокъду.

Мени лирикалы 101 назмудан къуралган «Акъ кёгюрчюнле» деген бу китабымы баш мураты адамла, суймекликни сыйын мийикде, сезимин джюреклеринде тутуб, багъалатыб, анга керти болуб джашарларын излейди. Алай болса, адамланы джашаулары, бири-бири бла келишиулери, ёсюб келген джаш тёлуге энчи юлгю кёргюзюулери, иги да, ариу да боллукъду. Бу лирикалы китаб аны ючюн джазылгъанды.

**Автор**

---

*Сюймеклик –  
сейир нюрдю*

---

---



## Аулайды бютеу Аламны

Сюймеклик багъалатад адамланы,  
Ашхылыкъ орналыб турурун излейд.  
Хурметин тѣге, джарытад тауланы,  
Ол мамыр джашауну джарыгъын теджейд.

Аны сыйлагъанны чомарт саугъалайд,  
Сюймейд алдагъанны, эки бетлини.  
Тюзню, кертини джюрегинде джашайд,  
Къачады къатындан кир иннетлини.

Атаны, ананы сыйлайд, ийнакълайд,  
Умуту джайылад джерни юсюне.  
Эгечни, къарнашны, сабийни джакълайд,  
Сезими учады дуня джюзюне.

Сюймеклик аулайды бютеу Аламны,  
Табигъатны таурухунда кѣрюнед.  
Юйюрюнде джанад акъ джулдузланы,  
Сейирлиги джанкъылычха бѣлюнед.





### **О, суймеклик!**

О, суймеклик! Алтын мер-мер кьаласа,  
Ариулукъ тутхан гокка ханс таласа.  
Таймаздан джырлайса сен татлы джырла,  
Тынгылайдыла джугьутурла, буула.

О, суймеклик! Сен джудузла чачаса,  
Джюреклени джомакълагъа ачаса.  
Бюркесе чокъуракъны бурчакъларын,  
Чомарт джашнатаса джылны чакъларын.

О, суймеклик! Сен насыбха уяса,  
Накьут-налмаз чучхурланы кьуяса.

Тиесе къызны нюр джаякъларына,  
Чырмаласа, ариу аякъларына.

О, суймеклик! Чолпанда кёрюнесе,  
Сен Айны кюмюшюне бёлюнесе.  
Тюзлюк, кертилик сен сайлагъан джолунг,  
Сууаблыкъ ишлейди чомартлыкъ къолунг.

О, суймеклик! Къууанчлагъа саркъаса,  
Аллах бизге берген, уллу саугъаса.  
Сен бек кертисе, ташаса, ариуса,  
Игиликге учундургъан къарыуса.





### **Сен алтын Кюннге ушайса**

Сени кѳргенни кѳзюн кѳамата,  
Джомакълы джуртда джашайса.  
Джулдузлу кѳкге нюр кѳарам ата,  
Сен алтын Кюннге ушайса.

Ариу, сейирлик бишген джилекге,  
Сюйюб, кѳууаныб, кѳарайса.  
Атса да булут джерге кѳлекге,  
Сен алтын Кюннге ушайса.

Хур эгеч болуб таурухлу Айгѳа,  
Ариу чачынгы тарайса.

Ашхылыкъ джая тау Къарачайгъа,  
Сен алтын Кюннге ушайса.

Нюрлю бетингде гюллеринг чагъад,  
Сейир къудуретли джайса.  
Иннет чучхурунг мийикден агъад,  
Сен алтын Кюннге ушайса.

Къанатын кериб билим тылпыуунг,  
Таулу джуртунга джарайса,  
Мени джарытыб джюрек джылыууанг,  
Сен алтын Кюннге ушайса.





### Сюй мени

Сюй мени, сениге тансыкъ болгъанма,  
Джюрек отум джанады гюрюлдеб.  
Мен таза суймекликден толгъанма,  
Кюн джарыгъымса, насыбымса деб.

Сюй мени, сениге джырлай джашайма,  
Ариуумса, алтынымса, кесинг.  
Чырайынгы джылы ийнакълайма,  
Меннге бурулсун сагъышынг, эсинг.

Сюй мени, ёмюрюме багъалымса,  
Сени сыйынгы тутарма мийик.

Джашауда ышанныкъ дагъанымса,  
Таурухум, акъ маралым, нюр кийик.

Сюй мени, сен ашхы муратымса,  
Боллукъса юйюрюмю хазнасы.  
Баш умутум, байрамым, джанымса,  
Керек тюлдю къызланы башхасы.





### Кюном, Айым

О, нюзюрюм, бек багъалым,  
Сенсе, джашаум, тамалым.  
О, акъкъанат кёгюрчюнюм,  
Сенсе, къууанч берген кюнюм.

О, насыбым, къарылгъачым,  
Сенсе, джазым, алтын къачым.  
О, джомакъ-таурух алгъышым,  
Сенсе, умутум, сагъышым.

О, дарман хауам, солуум,  
Сенсе, суймеклик джылыуум.

О, булбулум, огъур тангым,  
Сенсе, тюшюм, тюнюм, ангым.

О, кьушкъанат терк учуум,  
Сенсе, чучхурум, бал сууум.  
О, алтын- кюмюш бурчагъым,  
Сенсе, ариу кьубулчагъым.

О, ёмюр джашау байлыгъым,  
Сенсе, джашнагъан джайлыгъым.  
О, ингил татлы ийнагъым,  
Сенсе, нюр таякъ кьучагъым.

О, жарыкъ нюрюм, кёзлерим,  
Сенгелле джюрек сёзлерим.  
О, сейирлик гюллю джайым,  
Сенсе, мени Кюнюм, Айым.





### Къууанч тегюледи

Таулу къызны сёзюню хазнасындан,  
Джюрегими гюллери чагъалла.  
Аны джылы, джюрек ушагъындан,  
Мени къайгъыларым чачылалла.

Акъыртын, джумушакъ шыбырдаса,  
Шохлукъ къанатлары къагъылалла.  
Ариу ышарыб, Кюнча къараса,  
Джаякълары джанымы джылыталла.

Аны чырайлы нюр сойюмюнден,  
Тенгизча, бир къууанч тегюледи.

Керти, таза, уллу сезиминден,  
Учундургъан сейир кюч келеди.

Нюр суююмю мени къучагъымы,  
Хур суймекликге кериб барады.  
Бютеулей джюрегими ангымы,  
Насыбны отунда джандырады.

Къууанч берелле келтириб джайны,  
Джулдуз кёзлери хапар айталла.  
Ийнакълай, джомакъла тёкген Айны,  
Ала учунуугъа чакъыралла.





## Ариуума

Кюн таякъ, мени халымы айт анга,  
Ариуума, аны бла чыгъама тангнга.

Кюн таякъ, саугъала бер сезимими,  
Ариуума кызыннган джюрегими.

Кюн таякъ, кѣргюз мыдах болумуму,  
Ариуума узатама къолуму.

Кюн таякъ киргиз мени сѣзлерине,  
Ариууму тансыкъма кѣзлерине.

Кюн таякъ, алыб бар акъыл джуртуму,  
Ариуума къуй насыб умутуму.

Кюн таякъ, терк джетдир суймеклигими,  
Ариуума ийнакъ кюймеклигими.

Кюн таякъ, элт накъутлу сагъышымы,  
Ариуума налмазлы алгъышымы.

Кюн таякъ анга джерлейме эсими,  
Ариуума атагъанма кесими.





### Мени чакъыраса

Умут сезимим учады сеннге,  
Тынгыламайды джюрегим меннге.  
Джырлай, джазады кьолумда кьалам,  
Сюймеклигиме шагъатды Алам.

Джумушакъ тийиб сени бетинге,  
Джылыу тегейим чыммакъ этинге.  
Айтайм кемсиз болгъанымы мен,  
Атла аллынга кенг турмайын сен.

Джюрек кылыма назик бёлюндюнг,  
Меннге сен ариу, сейир кёрюндюнг.

Къуру игилик этер амалым  
Болдунг, ёмюрге джашау тамалым.

Ышара, чыгъыб джулдуз джолунгдан,  
Тутайым дайым, ариу къолунгдан.  
Излейме мадар, миниб кёпюрге,  
Бирге джашар ючюн, биз ёмюрге.

Джанад къанымы къайнатыб шынкъарт,  
Сюйюб турлукъма болгъунчуннга къарт.  
Талпыйма сеннге айтыргъа ариу,  
Кетиб къалгъынчын сезим бла къарыу.

Атайма джашау джырымы сеннге,  
Къанат бергенлей тураса меннге.  
Таукел чакъыра, булгъайса сен къол,  
Алыб барады суймекликге джол.





### Кюледи гюлчюк

Кюледи гюлчюк, тамашады хансчыкъ,  
Зауукъланады, тегерекге къарай.  
Къууанч тыбырлыд, аны башы ачыкъ,  
Нюрюн тегеди, алтын чачын тарай.

Кюледи гюлчюк, талпыйд селеширге,  
Тансыкълыкъ къучагъын ачады меннге.  
Джюрегини джылыуун юлеширге  
Излейди, чакъырад кесине тенгиге.

Кюледи гюлчюк, ол этеди ушакъ,  
Салкъын аязчыкъ ойнайды ныгъышда.

Ауазы джырлайды татлы, джумушакъ,  
Сюймеклик тѣгюледи чыгъышда.

Кюледи кюлчюк, джайыб къанатларын,  
Джаныма болгъанды багъалы саугъа.  
Харс урады ачыб чапыракъларын,  
Джылы салам беред къатында таугъа.

Кюледи гюлчюк, меннге таб айланыб,  
Кѣзюн къысады, суююмлю ышарад.  
Мен да къарайма анга бек къууаныб,  
Сюймекликден толуб бетим къызарад.

Кюледи гюлчюк, аллымы терк тыйыб,  
Таурух сезимини чучхурун къуя.  
Кесине бютеу ашхылыкъны джыйыб,  
Джюрегимде салыб суюмеклик уя.





## Насыбдан толтурайым

Минг джудуз болуб, мийик башынгдан,  
Кечеги джолунгу джарытайым.  
Сюйген джюрегим кетмей къатынгдан,  
Мен сени къууанчдан толтурайым.

Алтын Кюн болуб, кёксюлдиом кёкден,  
Нюрлю джанынгы мен джылытайым.  
Сюймеклик тенгиз тегюле чекден,  
Насыбны терюнде ойнатайым.

Булбул джырлы акъыл гезеними,  
Ёмюрюме сеннге, мен бурайым.

Чыкъча, таза сезим ёзеними,  
Джомакъ эшигин сеннге ачайым.

Джазгъы тангча, джумушакълыгъымы,  
Бютеу игилигими, берейим.  
Джылыууму, татлы ушагъымы,  
Нюр къанатларын сеннге керейим.





### Сюймекликни хазнасы

Сюймеклик кёб ёмюрлени турады,  
Джулдузча, кечелени джарытады.  
Ол, отдан, суудан, буздан да ётеди,  
Керти адамлагъа къуллукъ этеди.

Нюр болуб, къуюлад таза джюрекге,  
Таурух уя салады кёкюрекге.  
Мийикледе аламат кёрюнеди  
Джарытыб, джанкъылычдан секиреди.

Къарыусузгъа беред учар къанатла,  
Чабадыла анда кёб дюлдюр атла.

Джюреги кирсизд, иннети тазады,  
Сейирлик къаламы къууанч джазады.

Насыбны аламат джырларын джырлайд,  
Ол, мамырлы джерни юсюнде джайлайд.  
Таулада, тюзледе бирча учады,  
Бизге суймеклик хазнасын чачады.





### Хурметинг суюдюреди

Сени бетингде алтын гюллеринг,  
Кюннге эришиб, джаналла.  
Суюмеклик бла байланган сёзлеринг,  
Акь джулдузлача, чагъалла.

Тартадыла къызыл эринлеринг,  
Мени сезимим джашнайды.  
Ышарадыла джарыкъ кёзлеринг,  
Джюрегим тебиб башлайды.

Санларынгы бою табды, мийик,  
Чырайынг, джай джашнагъанчад.

Джел къакъдыргъан джюрюшюнг-тау кийик,  
Акбылынг, нюр таягычад.

Таурух къарамынгы оту джанад,  
Игилиги кюйдюреди.  
Санга мийикден Ай да сукъланад,  
Хурмет хазнанг сюдюреди.

Джашай, башхалагъа излей игилик,  
Адамлыкъ хазнанг багъады.  
Сюймеклигиме бере тирилик,  
Нюр джылыу болуб агъады.





### **Сайлаучуну аякълары таядыла**

Ауур сагъышланы бирден чачыгъыз,  
Керексиз сайлауну узакъ атыгъыз.  
Нюр бетигизни кюнюн тийдиригиз,  
Кесигизни джашлагъа суйдюрюгюз.

Сиз тилеб келгеннге, огъай, демегиз,  
Буз къаялагъа мийик ёрлемегиз.  
Игиден-игини излеб турмагъыз,  
Адамлыгъы болгъаннга сырт бурмагъыз.

Хазнагъыз азайыб барад билигиз,  
Джашау джолугъузгъа таукел киригиз.

Илешдириуню кючюн кѳурутмагъыз,  
Юйдеги кѳурау борчду, унутмагъыз.

Заман седирейд, джылла учадыла,  
Бек сайлаучудан ала кѳачадыла.  
Джашлыкъ гюллери мууал боладыла,  
Кѳартлыкъ чыгъанакълары толадыла.

Негерле кѳурагъыз, бирге туругъуз,  
Джашауну чархын сиз таукел буругъуз.  
Ашыгъыгъыз, джылла таркѳаядыла,  
Сайлаучуну аякълары таядыла.





### Джашау байлыгъым

Там бла келликме! — деб, джылы къарагъаненг,  
Меннге, нюрю тегюле кезлеринги.  
Балхам болуб, джюрегиме джарагъаненг,  
Аузынг джырлай татлы сезлеринги.

Экинчи кюн келди, мен сени сакълайма,  
Чырт тѣзалмайма олтуруб, не туруб.  
Къан тамырларым боркъулдайла, къайнайла,  
Бир кѣкге, бир джерге аталла буруб.

Ючюнчю, тѣртюнчю, бешинчи болгъанды,  
Келмейсе, талпыб къарайма джолунга.  
Сеннге джюрегим сагъышладан толгъанды,  
Алтын сууча къуюлурма къолунга.

Чырайынга, кесинге тансыкъ этгенсе,  
Сен джулдузну джарыгъыса, тамаша.  
Ингил сезимими тѣрюне ѣтгенсе,  
Тауланы хур къызы, кѣб джылны джаша.

Заман озады, кюнле ѣтюб баралла,  
Эсимде джашайса, гюллю джайлыгъым.  
Меннге нюрлю кѣзлеринг нѣгер болалла,  
Багъалы хазнамса, джашау байлыгъым.

Шо, унутма мени, бир ал эсинге,  
Сен аллай бир тансыкъ ѣтме кесинге.





## Уяла къарайса

Джылыуун джая хурметинги эни,  
Бетинги нюрю джарытады сени.  
Джюрегинг илешиб меннге хар къуру,  
Уяла къарайса, джашыртын, туру.

Тылпыуунг эритед буз джитилени,  
Сюймеклигинг чакъдырады гюллени.  
Сени кёреме, джукъласам тюшюмде,  
Сагъышым, сезимим, байлайд тюнюмде.

Меннге эсинги бёлгенинге сау бол,  
Уллу насыбдан, джарыкъ къууанчдан тол.

Джюрек чомартлыгъынг бютюн эсленед,  
Сюйюмюнг, ариу джомакъча, кёрюнед.

Айтайым джашырмай, ачыкълаб, сеннге,  
Сюеме джууукъда, кетсенг да кенгнге.  
Менде джюрек чучхур джырлайды, саркъад,  
Тансыкълыкъ отум да шынкъартлы джаркъад.

Бек къарт болсанг да, болурма дагъанынг,  
Сыйынг, тыбырынг, джангыз сакълагъанынг.  
Сени джашнатырма, сюйюб, ийнакълай,,  
Сейир джанкъылышча, джылы къучакълай.





### Сени юсюнгден сагъыш этеме

Мен сени юсюнгден сагъыш этеме,  
Джюрегими дайым топпа – толтуруб.  
Тансыкълыгъым бла кёкге джетеме,  
Турсам да сени къатынгда олтуруб.

Мен сени юсюнгден сагъыш этеме,  
Кюмюш джулдузла кёз къысхан заманда.  
Къууанчыма кенг къучакъ кереме,  
Сени излейме бютеу дуняда.

Мен сени юсюнгден сагъыш этеме,  
Сюймекликни нюрю тохтаусуз джауа.  
Уялыб, сёлешмей, озуб кетеме,  
Къатынг бла, джетмейин солургъа хауа.



## Къаты къучакъла

Эсиме, сормай, джашыртын кирдинг,  
Кюнлю къанатынгы кенгнге кердинг.  
Меннге кесинги кемсиз сюдюрдюнг,  
Уллу сериюуюн отда кюйдюрдюнг.

Мыдах болама, къыйынды сенсиз,  
Булбул джыр, сени сюеме кемсиз.  
Джашау джолуму нюрю дженгил джет,  
Джюрек къылымы, джанымы сау эт.

Ышарадыла, багъалы кёзле,  
Айтаса, татлы, джумушакъ сёзле.

Чабханлай келесе, талпыб меннге,  
Тазад суймеклигим, кертид сеннге.

Тюшгенбиз джана тургъан шынкъартха,  
Къууанч джыламуць тегюлед отха.  
Бирге болайыкъ, къаты къучакъла,  
Чолпан джулдузум, мени ийнакъла.

Джюрегим чыгъаргъа джетиб урад,  
Суймеклик чучхурум къаты бурад.  
Сеннге къараудан тоймайды кезюм,  
Аталады умутум, хар сезюм.





### **Сюймеклик джырыса джюрегими**

Джелчик ийнакълайды чачымы тарай,  
Джашайма, тоялмай мен сеннге къарай.  
Нюрден джарытаса бютеу эсими,  
Сен сюймеклик джырыса джюрегими.

Сейирлик кёрюнесе чууакъ кёкде,  
Таурухлу джанкылышча, узакъ чекде.  
Мен тазалыкъгъа береме кесими,  
Сен сюймеклик джырыса джюрегими.

Кетермейин тур чырт мени эсингден,  
Джаша, джууукъ тартыб, тюртмей кесингден.

Санга атайма нюрлю сезимими,  
Сен суймеклик джырыса джюрегими.

Ай бла ушакъ этед булбул ауазынг,  
Мени байлагъанды гокка ханс джазынг.  
Бузну эритед оту кёкюрегими,  
Сен суймеклик джырыса джюрегими.

Керти иннетликни уллуд багъасы,  
Алтынды, кюмюшдю, тёрю, джагъасы.  
Харакети бол джашау керегими,  
Сен суймеклик джырыса джюрегими.





### Сир къатама аллында

Сени таба бир зат хаман тартады,  
Иерге излемейд узакъ, не кери.  
Кёрюнмеген кюч, къуршоулаб, тутады,  
Къоймайын атландырад сеннге дери.

Джели учуруб, терк алыб барады,  
Къатынга элтиб сюелтеди мени.  
Къалай ариуду! – деб, къараб турады,  
Сейирлигинги кёргюзеди сени.

Сюйюм кёлюнге терен батама,  
Къарайса, джаным, нюр тёге, ышара.  
Сеннге айтыр сёзюмю унутама,  
Мен сир къатама аллында, къызара.



### **Ай бла джулдуз**

Айны, джулдуз киреди кьучагына,  
Ол да ашыгъад аны муратына.  
Кёрюнселе да мийикде, узакъда,  
Адамла тюшелле алагъа тузакъгъа.

Ай бла джулдузну джаналла кёзлери,  
Таза суймекликди, татлы сёзлери.  
Сау кюнню, кечени джырлайла ала,  
Джашнайла, болгъанча гокка ханс тала.

Джашайла юйюр болургъа ышаныб,  
Арада суймекликни оту джаныб,

Джюрек макъамла бир-бирин ийнакълай,  
Ышанмакълакъны тауруху къучакълай.

Айгъа джудуз къараб, тегед суйюмюн,  
Ол да ышарады, чачады нюрюн.  
Таза сезимле тууа кёкюрекде,  
Къанатлы суймеклик джашнайды кёкде.





### **Мени джюрегим кьюуанады санга**

Кавказ таулары алтын булбулуса,  
Сен ушайса джомакълы джазгъы тангнга.  
Алтын Кюнча, джарытаса, джылыса.  
Мени джюрегим кьюуанады санга.

Сен акъыллы сёзле кюраб айтаса,  
Ышарыб джумушакъ къарайса манга.  
Ашхылыкъгъа, игиликге къайтаса,  
Мени джюрегим кьюуанады санга.

Аузынг сейирликге уянады,  
Сен кюллукъ этесе туугъан халкъынгга.

Джюрек кылынг тюзлюкге бурулады,  
Мени джюрегим кыуанады санга.

Адебинг, намысынг, тауча, мийикди,  
Иссилик бересе кыш кыяматда.  
Ариулугъунг джулдузлагъа джетеди,  
Мени джюрегим кыуанады санга.

Нюрюнг тегюледи, тепсей, бараса,  
Насыблы саугъаса, сени алгъаннга.  
Акылымда, сезимимде тураса,  
Мени джюрегим кыуанады санга.





### Джулдуз бла Ай

Алтын джулдуз, кюмюш Айны кучакълай,  
Кесини джылыуун, ийнагъын беред.  
Джарыгъы бла ариулукъну ийнакълай,  
Ол суймекликни юсюнден селешед.

Кел, джаша, мени кѳууанчдан кѳарата,  
Талпыб излейме, джюрек гюлюм чагъа.  
Сени сакълай, сау дунияны джарыта,  
Джырлайма, нюр джыламулкъларым тама.

Тансыкъ болгъанма, сен бек багъалымса,  
Кѳаты кѳысарма, мен сени кесиме.

Кел кѳучагъыма, ёмюр тамалымса,  
Сен ийнан мени исси сѳзлериме.

Дейди, джудуз джюрек джарыгъын Айгъа  
Тёгеди, сѳймеклигин кемсиз этиб.  
Ушатыб джер юсюнде гюллю джайгъа,  
Исси салам беред къатына джетиб.





### **Сюймекликни аркъаны мени тутад**

Джомакълы тау джуртда джылы къучакълай,  
Огъурлулукъну кёгю кючюн бурад.  
Ашхылыкъны булбул джыры ийнакълай,  
Сюймекликни аркъаны мени тутад,

Кюн таягъы джюрегими джарыта,  
Джанкъылышча, туурамда бир къыз турад.  
Насыб тауну тѣппесинден къарата,  
Сюймекликни аркъаны мени тутад.

Сюйюмюню джарыкъ кючю джыйылыб,  
Меннге, кюмюш чучхур болуб, къуюлад.

Шынкъарт оту санларыма джайылыб,  
Сюймекликни аркъаны мени тутад.

Джанымы джарытады аны кюню,  
Джюрек төрүм уллу кьууанчдан толад.  
Сейир бетинде чагъыб кьызыл гюлю,  
Сюймекликни аркъаны мени тутад.





### **Къарны эритеди тылпыуунг**

Къарны эритеди сени тылпыуунг,  
Кюнню таягыча, къанатын керед.  
Гокка ханс чакъдыра джюрек джылыуунг,  
Ариугъа, тамашагъа кесин бурад.

Къарны эритеди сени тылпыуунг,  
Чокъуракъ сууу барады шоркъулдай.  
Таурухча, бурад суймеклик къарыуунг,  
Мени тансыкълаб, къаты къучакълай.

Къарны эритеди сени тылпыуунг,  
Джарытады, ийнакълаб ангымы.

Ариуду джел къагъдыра барыуунг,  
Сагъышлы атдырама тангымы.

Къарны эритеди сени тылпыуунг,  
Къызарыб бишген татлы джилегим.  
Къууанчын тегеди меннге булбулунг,  
Сеннге учады мени джюрегим.

Къарны эритеди сени тылпыуунг,  
Мени алтын къанатлы шаркъ джулдузум.





### **Юйюнгю дагъаны болайым**

Сени мен, алтын Кюнча, джылытайым,  
Сени солугъан хауангдан толайым.  
Сени ичген сууунгча, шоркъулдайым,  
Салкъын ауазынг болуб ийнакълайым.

Сени мен насыбы джюрек тёрюнгю,  
Сени нюр джулдузу джашау кёгюнгю,  
Сени джашнагъан хар сейирлик кюнюнг,  
Болайым, зауукълу кеченг бла кюнюнг.

Сени мен мийик Айча, къучакълайым,  
Сени арымай кёб кюнню сакълайым.

Сени джюрек джылыуум бла джакълайым,  
Сюймеклик шоркъанг болуб боркъулдайым.

Сени мен огъурлукъгъа сюдюрейим,  
Сени сыйынгы мийик кѣлтюрейим.  
Сени хур джашаугъа учундурайым,  
Юйюнгде насыб тирмен бурдурайым.

Сени мен джарыгъы джашау тангынгы,  
Сени къанаты хурметли ангынгы.  
Сени джюрегинги уллу къууанчы  
Болайым, хар инджиуюнгю хорламы.

Сени мен джолунгда гюлча, чагъайым,  
Сени чачынга джулдузну тагъайым.  
Сени джомакълагъа учундурайым,  
Юйюнгю дагъаны болуб турайым.





### Ай бла шоркъя

Барады Ай нюрюн бериб,  
Къарайд суугъа къучакъ кериб.  
Алай ашырады сау кюнюн.  
Ингир болса, чокъуракъгъа,

Кириб къалад джыр шоркъагъа.  
Зауукълу ётдюреди тюнюн.  
Терен кёмюлюб ичине,  
Базад суймеклик кючюне,

Джюзеди, таукел къанатланад.  
Толкъун ойнайд, эсин бёлюб,

Бетин сылайд, къайтыб келиб,  
Кюмюш хазна таб ийнакъланад.

Батад, чыгъад джумушакъгъа,  
Сюйюб тынгылайд ушакъгъа,  
Тёгед джарыгъын табигъатха.  
Анга къууанад тегерек,

Къоннганча къолгъа гёбелек,  
Къарайд сейирлик аламатха.  
Экиси бир-бирин сюйюб,  
Сюймеклик отунда кюйюб,

Чыгъадыла къууанчлы тангнга.  
Ай джюзеди эркин кёкге,  
Кетиб бара хауа чекге,  
Келликме! – деб, кычырад анга.





### Учарым келед

Сени кёрсем, тепсеб башлайдыла,  
Аякъларым, тынгыламай меннге.  
Сени кёрсем, кьюуаныб джырлайдыла,  
Джюрек кыллерым, джайыла кенгнге.

Сени кёрсем, санларым ойнайдыла,  
Мени, тау кьюшча, учарым келед.  
Сени кёрсем, джулдузла джанадыла,  
Джарытадыла баргъан джолуму.

Сени кёрсем, булбулла учадыла,  
Ала, айталла джырлай атынгы.

Сени кёрсем, кёзлеринг чачадыла,  
Нюр, сакъларым келеди къатынгы.

Сени кёрсем, учунуб джетедиле,  
Къууанч берелле татлы сёзлеринг.  
Сени кёрсем, джарсыула кетедиле,  
Чакъырадыла джулдуз кёзлеринг.





### Сейирди бютюн

Джерде джашау сейирди бютюн,  
Ол дунягъа береди кючюн.  
Сюймеклик шыбырдай акъыртын,  
Джюреклеге киред джашыртын.

Насыбны сезимин туудурад,  
Джомакълы кёлде джууундурад.  
Джырлай келед узатыб къолун,  
Джаш бла къызны джарытыб джолун.

Тюзлюк тутад, джарсытмайды тенг,  
Этеди адамны кёлюн кенг.

Чакъырады джарыкъ джашаргъа,  
Джылыуунда, гюлча, чагъаргъа.

Аманлыкъны узакъгъа сюред,  
Къуру да игиликни кёред.  
Бал чучхуру бурчакъла чачад,  
Джюрекленни насыбха ачад.





### Сюймеклик ушакъ

Мен къарайма, сүймекликден толуб,  
Джазгы джашнауну ариулугъуна.  
Дарман хауадан тойгъунчун тогъуб,  
Тау табигъатны къарыулугъуна.

Чыпчыкъ джыр тегерекге джайыла,  
Шантал терекни чакъгъанларына.  
Чыкъ чапыракъ юсюнде джыйыла,  
Чыммакъ тамчыла акъгъанларына.

Тынгылайма, шоркъаны джырына,  
Таукел барады силкиниб алгъа.

Шош аязны ариу макъамына,  
Тохтаусуз согъад, билмейди талгъа.

Мен булбуллагъа эжиу этеме,  
Джюрек къууаныб тегеди жарыкъ.  
Джазгъы кюнде жаргамдан ётеме,  
Къоянчыкъ къачад, болса да арыкъ.

Сюймеклик кючлейди джерни юсюн,  
Къууанама джазгъы джумушакъгъа.  
Ариулукъ джасайды дуня джюзюн,  
Къызгъанма джаз бла сейир ушакъгъа.





### Алтын джулдуз

Танымасамда, тансыкъ болгъанма,  
Джаным, сеннге сагъышдан толгъанма.  
Излейме, алтын джулдузум, кёрюн,  
Джанкъылышча, бояулагъа бёлюн.

Мени бла сёлеш, татлы булбулча,  
Хар озгъан кюн кёрюнед бир джылча.  
Ышарыб узат ариу къолунгу,  
Тилейме, джарыт джашау джолуму.

Нюр болуб, джюрегимде чакъгъанса,  
Тузакъгъа алыб, Кюннге такъгъанса.  
Къарайма узакъдан къуру сеннге,  
Бирге насыб кёрейик, уч меннге.

Сени джюрегинг, чыкъча, тазады,  
Сезиминг, акъылынга базады.  
Чырайынг Айча, джарыкъ ийнакълай,  
Джашайса акъылымда, джомакълай.

Аллах буюргъан аджал джетгинчин,  
Биз къууанча джырлайыкъ ёлгюнчюн.  
Акъ кёгюрчюнюм, ач къанатынгы,  
Сакълайма, айта ариу атынгы.





### Сен келсенг

Сен къатыма келсенг, Кюн джарыкъ тиед,  
Тёгерек джашнайды, гюл кийим киед.  
Табигъат болады ариудан – ариу,  
Меннге кьошулады таукеллик, къарыу.

Джюрекде чучхурум башлайды къайнаб,  
Туурамда насыбны джилтини ойнаб.  
Бютеулей сезимим сеннге бёлюнед,  
Дуния меннге таурух кибик кёрюнед.

Джазча, джашнаб, къууанч тыбырлы болуб,  
Сени суйюмюнгден, насыбдан толуб.

Кирпик къакъмайын, мен къарайма сеннге,  
Кесиме санаб бек багъалы тенгнге.

Сенден, Кюнденча, джылынады саным,  
Къууанч джырын джырлай бурулад къаным.  
Сейир таурухдача, биз учуб джерде,  
Джашайыкъ, джулдузлу, суймеклик тёрде.





### Эсим сеннге бѐлюнеди

Аллай бир меннге не зат этгененг,  
Энди, тансыкълаб, излейди джюрегим.  
Ышарыб, кюлюб, чам этиб кетгененг,  
Сеннге учадыла алгышы сѐзлерим.

Къуру да татлы сагъышла этеме,  
Сени юсюнгден, багъалым, ариуум.  
Мийик Айгъа, джудузлагъа джетеме,  
Къанатларымса, таркъаймаз къарыуум.

Эсимде бла сагъышымда джашайса,  
Тансыкъ болуб туралла сезимлерим.  
Танг жарыкъгъа, алтын Кюннге ушайса,  
Сеннге чагъалла джюрекде гюллерим.

Джашаем суймеклик бард деб ийнанмай,  
Тау кыушча, учаем кесиме база.  
Башхагъа эс бёлмей, чрытда къайгъырмай,  
Тураем таулагъа назмула джаза.

Меннге не зат болгъанын билелмей,  
Къарайма сейирлик нюрюнгден толуб.  
Кесим джангыз такыйкъаны туралмай,  
Сеннге джюрегим джырлайд, булбул болуб.

Къолунгу силкиб менден узакъ кетме,  
Шаркъ джулдузча, джарытыб тур къатымда.  
Сен артыкълыкъ, зарауатлыкъ да этме,  
Джашаб тураса мени алгъышымда.

Акылым дайым чомарт бёлюнеди,  
Излейд суймеклигинг болургъа сени.  
Кече, кюн да тюрсюнюнг кёрюнеди,  
Чырайынг къаты тутуб иймейд мени.

Мен а ычхыныргъа бек кюрешеме,  
Амал-такъал этиб табмайма мадар.  
Сени бла нюзюрюмю юлешеме,  
Кел, бирге болайыкъ джашнатыб къадар.





### Джанкылышча кёрюнесе

Суйгенни джюреги джырлайд, дегененг,  
Ышара, меннге эсинг бёлюне.  
Къатым бла, аяз урдура, ётгененг,  
Айча бетингден, нюрюнг тёгюле.

Мен сени сакълайма джаным, ашыгъыб,  
Джюрек джырымы джырлай дуниягъа.  
Сезимлерим, гокка ханслача, чагъыб,  
Учалла сеннге-джомакъ уягъа.

Суймеклигинг, джулдузлагъа бёленед,  
Кетерге унамайд кёз туурамдан.

Ариулугъу, джангкылышча, кёрюнед,  
Чолпан джарыкъ тегюлед кьарамындан.

Къызыл бла сары, акъ бояуладан,  
Джасалыб, кьарайд кёз кыса манга.  
Бютеулей толуб татлы сагъышладан,  
Аны бла чыгъама огъур тангнга.

Кюн кибик, джарытады тегерекни,  
Чырайы, кёзлерими кьаматад.  
Мийик учуугъа кьозгъайды джюрекни,  
Уллу адамлыкъны багъалатад.

Кел, ашыкъ, ариу кыыз, излейме сени,  
Сюйюмлю ышара тут кьолуму.  
Умутуму джулдузун джандыр мени,  
Насыбдан толтур джашау джолуму.





### **Кел! деб, сен мени чакъырсанг**

Кел! деб, сен мени чакъырсанг,  
Терк джел ургъанча, джетерме.  
Сакълаб аллыма къарасанг,  
Океандан да ётерме.

Кел! деб, сен мени чакъырсанг,  
Шаркъ джулдузча, джарытырма.  
Къууанчымса, деб джырласанг,  
Алтын Кюнча, джылытырма.

Кел! деб, сен мени чакъырсанг,  
Къушча, мийкде учарма.

Тансыкъма, деб къучакъласанг,  
Къызгъан джюрекни ачарма.

Кел! деб, сен мени чакъырсанг,  
Нюр джарыкъ болуб тиерме.  
Тюз иннет бла алгъышласанг,  
Джанымыча бек сюерме.

Кел! деб, сен мени чакъырсанг,  
Джан дарман – дарынг болурма.  
Алтын гокка хансча, чакъсанг,  
Чучхур болуб къуюлурма.

Кел! деб, сен мени чакъырсанг,  
Джарсыуунгу къоратырма.  
Нюзюрюмсе, деб ышарсанг,  
Сеннге джырымы джырларма.

Кел! деб, сен мени чакъырсанг,  
Намыс эте, уялырма.  
Насыбымса, деб сакъласанг,  
Джюрек тѳрюме салырма.





### Атышгы айтама

Сюймеклигинг джерни аулай,  
Сен, Кюн болуб, меннге тийдинг.  
Кенг кьууанчын, нюрюн саулай,  
Джюрегиме терен ийдинг.

Джылытады насыб бериб,  
Булбул джыр кибик, ийнакьлайд.  
Кьушча, кьанатларын кериб,  
Ол мени джылы кьучакьлайд.

Керти тенглик этед меннге,  
Джарытад джашау джолуму.

Нюрюн джая турмуш кенгнге,  
Алгышлай тутад кьолуму.

Айтама сени атынгы,  
Джулдузла кьарайла бизге.  
Сакъларым келед кьатынгы,  
Сени махтай таугъа, тюзге.





## Меннге кьууанч бересе

Кёк джулдузлу ауушла,  
Сеннге суююб кьарайла.  
Къуш кьанатлы тауушла,  
Джумушакъ ийнакьлайла.

Сени иннетинг тазад,  
Акьылынг а, джарыкьды.  
Фахму кьаламынг джазад,  
Сезиминг кьууанчлыкьды.

Сен, ариулукуьдан толуб,  
Кюннге кьучакъ кересе.

Насыбны төрү болуб,  
Меннге кѳууанч бересе.

Сенде джашайд игилѳк,  
Джолуму джарытаса.  
Юйюрсюннгенд тирилик,  
Мийикден кѳаратаса.

Сени татлы аузынг,  
Булбул джыргѳа ушайды.  
Ариулугѳунг, чырайынг,  
Джюрегимде джашайды.





### **Сюймесенг, аллыкъ тюлме мен сени**

Ашхылыкъны тау гюллерин чакъдыр,  
Игиликни акъ чучхурун акъдыр.  
Сюесенг, ашыкъ, суй сен мени,  
Сюймесенг, аллыкъ тюлме мен сени.

Кемсиз эт, къууан, сакълаб къатымы,  
Айт кече, кюн къайтарыб атымы.  
Сюесенг, ашыкъ, суй сен мени,  
Сюймесенг, аллыкъ тюлме мен сени.

Фахмуну, билимни, сен кюзгюсю,  
Тюзлюкню сакълаб, болуб юлгюсю.  
Сюесенг, ашыкъ, суй сен мени,

Сюймесенг, аллыкъ тюлме мен сени.

Тюрсюнюнг ушай гокка ханс джайгъа,  
Чырайынг, мийикде, кюмюш Айгъа.

Сюеесенг, ашыкъ, суй сен мени,  
Сюймесенг, аллыкъ тюлме мен сени.

Сейир нюр теге джудуз кезлеринг,  
Кюнча, джылыта татлы сезлеринг.

Сюеесенг, ашыкъ, суй сен мени,  
Сюймесенг, аллыкъ тюлме мен сени.

Иннетинг таза, тюз, керти болуб,  
Джюрегинг, джарыкъ сезимден толуб,

Сюеесенг, ашыкъ, суй сен мени,  
Сюймесенг, аллыкъ тюлме мен сени.

Уллу тансыкълыкъ алыб тузакъгъа,  
Огъурлукъ белеб суймеклик чакъгъа,

Сюеесенг, ашыкъ, суй сен мени,  
Сюймесенг, аллыкъ тюлме мен сени.

Ёмюрге излеб бирге джашаргъа,  
Мени бла бир азыкъны ашаргъа.

Сюеесенг, ашыкъ, суй сен мени,  
Сюймесенг, аллыкъ тюлме мен сени



### Уллу Аллах сауғалар экибизни

Кюн джарыкъ болуб, джюрегими джылыт,  
Мени джангызлыкъдан айырыб джарыт.  
Сюймеклик гоппаннга къуюб къууанчны,  
Меннге тедже, сен зауукълу джубанчны.

Бек ариуладан онглуду чырайынг,  
Сейирлик къурайды насыб чырагъынг.  
Сени кѳрген тюшеди тузагъынга,  
Толгъан кюмюш Ай ушайд сыфатынга.

Джаягъыма джаягъынгы сюйюб сал,  
Ёмюрюме меннге нѳгер болуб къал.

Бири-бирибизни сыйлаб джашайыкъ,  
Биз керти суймеклик азыкъ ашайыкъ.

Мени сёзлериме эс ий тынгыла,  
Джюрегими хорлагъанса, ангыла.  
Дайым тутайыкъ кертилигибизни,  
Уллу Аллах саугъалар экибизни.





### **Меники тюлсе, деб ахсынама**

Субай санларынг сейирлик къурайла,  
Джудуз кёзлеринг, джылытыб, къарайла.  
Назик сезимлерим джаныб учама,  
Сен меники тюлсе, деб ахсынама.

Къызыл гюллеринг бетинги джасайла,  
Зауукълукъну, ариулукъну марайла.  
Джюрегими эшиклерин ачама,  
Сен меники тюлсе, деб ахсынама.

Келбетинг, чырайынг тау табигъатчад,  
Къууанчлы ышарыуунг кюн таякъчад.  
Джюрюген джолунга гюлле салама,  
Сен меники тюлсе, деб ахсынама.

Къарамынг бла сейирлик туудураса.  
Сен насыб нюрюнгю чомарт къуяса.  
Айгъа ушатыб, аллынга учама,  
Сен меники тюлсе, деб ахсынама.





### **Джомакълыкъны чархы**

Сюймеклигинги джыры  
Кюн чыкъгъанга ушайды,  
Макъамы, сейирлик джыры  
Джюрегимде джашайды.

Таулу къызны чырайыны  
Нюр джылыуу урады,  
Ариулукъну, ашхылыкъны  
Джомакъ чархын бурады.

Таза, татлы чучхурундан  
Мен тогъургъа излейме,  
Къанатлы игиликни  
Саугъала, деб тилейме.

Сюйюб, садакъ къашлагъа,  
Чолпан кёзлеге къарайма,  
Джашырылгъан муратымы  
Джангыз сеннге атайма.

Къууанчымы табарыкъма  
Мен толу ышанама,  
Кече, кюн кемсиз кюйдюрген  
Сагъыш отда джанама.

Къыш сууукъда тереклени  
Чакъгъанларын кёреме,  
Джашнагъан табигъатха  
Къучагъымы кереме.

Джюрегинги уят, джырлат,  
Мен суйюб тынгыларча,  
Сейирлик къарамынгы,  
Ауазынгы ийнакъларча.

Джандыр суймеклик отунгу,  
Джулдузлагъа учарча,  
Джюреклерибиз бир болуб,  
Насыб джашау къурарча



### **Сюеме мен сени**

Джарытаса, башхаладан ариу,  
Сенде джашайд огъурлукъну эни.  
Джюрютесе, учундургъан къарыу,  
Аны ючюн сюеме, мен сени.

Джюрегинг игиликге къууанад,  
Сени джудузунг джарытад мени.  
Джашауну нюр этген отунг джанад,  
Аны ючюн сюеме, мен сени.

Сезиминг тазады, джокъду кири,  
Адамлыгъынг ётеди чеклени.  
Сеннге тенг тюлдю къызланы бири,  
Аны ючюн сюеме, мен сени.

Сёзюнге кертисе, тюздю иннетинг,  
Сюесе табигъатны, гюллени.  
Сеннге алгъыш айтады миллетинг,  
Аны ючюн сюеме, мен сени.





### **Бизге игилик атайды джырын**

Сени джарыгъынг тартад кесине,  
Кемсиз этеди, алыб эсине.  
Кел! дейле ариу къара къашларынг,  
Къундузча джылтырагъан чачларынг.

Мени сеннге тюбешдирди джазыу,  
Джюрегим тебиб, урады кызыу.  
Бизге игилик атайды джырын,  
Сюймеклик тауну этмейин гырын.

Джулдузлу джолну учуб барайыкъ,  
Ариулукъгъа, ашхыгъа къарайыкъ.  
Экибиз джангы джашау къурайыкъ,  
Насыбны джибин бирге бурайыкъ.

Зарлыкъны, тарлыкъны къурутайыкъ,  
Ёхтем джюрюгенни унтайыкъ.  
Гюл ийис этген хауаны солуб.  
Бирге джашайыкъ, къууанчдан толуб.





### Къууан меннге тюбегенинге

Хаман къатынгда турур ючюн,  
Мен сеннге неми да берирме.  
Кюнлю таягъым джайыб кючюн,  
Сеннге къанатымы керирме.

Ийнан, джашау насыбынг болуб,  
Джолунгу дайым джарытырма.  
Сеннге суймеклигим топ-толуб,  
Таурух дуниядан къаратырма.

Къууан меннге тюбегенинге,  
Джюрек байлыгъынг джашнарыкъды.  
Сокъуранмайын суйгенинге,  
Хур джанынг рахат джашарыкъды.

Хурмет тюрсюнюнгю толтуруб.  
Алтын джулдузла джанарыкъла.  
Ариулукъ, сениге кючюн бериб,  
Насыб гюллеринг чагъарыкъла.

Бизни мамыр юйюрюбюзде,  
Ариу сабийле ёсерикле.  
Джашау джашнар хар кюнубюзде,  
Джюрекле кьууанч этерикле.





### **Къатынгдан кетерим келмейди**

Суймекликден мен ычхыналмайма,  
Джаш джюрегимде уяланнганды.  
Акъ маралым, сенсиз туралмайма,  
Чырайынг мени тузакълагъанды.

Бош болур бир мадар табалмайма,  
Сеннге, мен къарасам джаз болгъанчад.  
Нюр тюрсюнюнгден къутулалмайма,  
Алтын джулдузладан къуралгъанчад.

Кюлгенинг эсимден чырт кетмейди,  
Ауазынг меннге юйюрсюннгенди.  
Къатынгдан кетеригим келмейди.  
Сеннге хар сезимим бёлюннгенди.



### Сюйюмлю кёзле

Кёзлерингден ургъан Кюн джылыуунг,  
Джашау джолунгда гюл чакъдырады.  
Сени хурметинг, сейир къарыуунг,  
Ариулукъну джулдузун джандырады.

Уллу насыб бла джашнагъан къууанч,  
Алада кёрюннгенлей туралла.

Сабырлыкъ, мамырлыкъ, ёмюр джубанч,  
Нюр суймекликни джибин буралла.

Чолпан кёзледен джарыкъ тёгюлюб,  
Джуртуму суйюнюб къучакълайды.  
Минги Тауну башындан кёрюнюб,  
Чолпанча, чырайынг ийнакълайды.

Тузакъгъа ала суйюмлю кёзле,  
Учундуруб, джомакъгъа бёлейле.  
Меннге айтадыла татлы сёзле,  
Ышарыб, ушакъ эте, кюлелле.

Ариу кёзлеге кетгенди эсим,  
Сезим шоркъаларым боркъулдайла.  
Къарайма, джукъ айталмайын, кесим,  
Джюрегими къыллары джырлайла.





## Ариуса

Уриуса, чучхур бурчакъла чачханча,  
Минги Тауда гокка хансла чакъгъанча.  
Ариуса, тангны джарыгъы тийгенча,  
Чууакъ кёк джомакълы кийим кийгенча.

Ариуса, сен къызаргъан алтын Кюнча,  
Халкъгъа насыб берген сейирлик нюрча.  
Ариуса, таланы джасагъан бууча,  
Ёзенде кёгерген чокъуракъ сууча.

Ариуса, ауазынг джырлай булбулча,  
Хурмет берген къудуретли хур джылча.

Ариуса, чыммакъ сейир дууадакъча,  
Къууанч, огъурлулукъ келтирген чакъча.

Ариуса, кенг къашларынг къундузлача,  
Къызыл эринлеринг дугъумлача.  
Ариуса, нюр кёзлеринг чолпанлача,  
Алтынча, накъутча, эм налмазлача.

Ариуса, таза тенгиз толкъунлача,  
Сеннге белляу айтхан Кавказ таулада.  
Ариуса, мийикден ышаргъан Айча,  
Джюрек къозгъагъан джулдузлу джайча.

Сени ариулугъунг гюл чакъдырады,  
Сюймекликни джулдузун джандырады.  
Олду игиге, ашхыгъа учундургъан,  
Поэтни назму джазаргъа къызындыргъан.





### **Терекчик сеннге чакъырыб турад**

Къалын чегетде сыртны тѣбенинде,  
Къанатын джаяргъа излеб кенгнге,  
Джѣгечик ёсенд къаяны эрнинде,  
Башчыгъын къаратыб алтын Кюннге.

Мен андап тутуб ийилдим энгишге,  
Къобанны кѣрдюм, къайнайды джырлай.

Кюмюш толкунлары саркъа тенгишге,  
Чокъуракъ чакъырад кесине ойнай.

Тохта! деб, сен бек кычырдынг меннге,  
Эсими джыйдырдынг, къаратыб ёзеннге.  
Булбул ауазынг джайылды ёзеннге,  
Агъаргъан бетинг нюр теджей ёзге.

Барыб кирдинг терекчикни къойнуна,  
Ариу къарамынг меннге бурулуб.  
Эмилик шоркъаны къарай бойнуна,  
Турдунг, эсинг тереннге къурулуб.

Джюрек сезиминг алтын джырын бура,  
Къууанчын тегед, аямай кючюн.  
Ийне джитиден салкъын аяз ура,  
Ийнакълайд сени бек джылы бютюн.

Насыбха талпыб учунсам да алгъа,  
Кесими тыйдым, тартыб джюгенни.  
Суюуб къарадым нызыгъа, талгъа,  
Чапыракъларын сылай джашил кёкенни.

Барсала да кетиб кюнле ташайыб,  
Тансыкълыкъ къанымы бекден-бек бурад.  
Джылы, нюр къучагъын меннге джайыб,  
Терекчик сеннге чакъырыб турад.



### **Бир-бирибизге къучакъ керейик**

Учама сени Кюн джарыгъынга,  
Джюрегим джырлай суймеклик сёзле.  
Къууанчха, тюзлюклю акъылынга,  
Чакъырадыла джудузлу кёзле.

Кюн таякъ алыб барама, джырлай,  
Ол джюрегинги джарытыр сени.  
Чокъуракъ чучхур, джылтырай, ойнай,  
От суймеклигими айтыр мени.

Ол, тенгизча, чайкъалады кызыу,  
Мийик толкъунларында джюзейик.  
Бизни насыбха бёлесин джазыу,  
Бир-бирибизге къучакъ керейик.



### Сагъышымы чач кенгиге

Бетингде суймекликни гюллери  
Чагъалла, меннге насыб бериб.  
Тау булбулча, джырлаб, суйсенг мени,  
Учарма сеннге къанат кериб.

Таза суймеклик, ариулукъ джашнайд,  
Эртденни нюр джарыгъы болуб.  
Ол мени кюйдюреди, тузакълайд,  
Джумушакъ ышарудан толуб.

Мен шынкъартда джанама, кюйюб,  
Сени от салгъан къарамынгдан.

Ашыкъ меннге, термилиб, суйюб,  
Джилтин чартлата атламынгдан.

Отну ышыра, болайыкъ бирге,  
Мени сагъышымы чач кенгнге.  
Биз саналыб насыблы юйюрге,  
Къууаныб джашайыкъ, кел меннге.





### Джюрегим излейди, сүйюб

Джаз тегеди сейир бояула,  
Тау кьоюнлагъа, ёзенлеге.  
Джашил, акъ бла кызыл оюула,  
Тюшедиле бютеу джерлеге.

Чучхур, къаядан учуб, ойнайд,  
Булбул кекде татлы джыр эшед.  
Кюнюш шоркъа, боркъулдаб, къайнайд,  
Уруб чыгъады, джерни тешед.

Мен, Кюн таякъ болуб, мийикден,  
Нюр бетинге тиеме, сүйюб.  
Акъбаш таула толуб кийикден,  
Джюрегим сени излейд, кюйюб.



### **Сюймеклик джулдуз джанады**

Ёмюрлени бура чархын,  
Джашау тохтаусуз барады.  
Дуниягъа тёге джарыгъын,  
Сюймеклик джулдуз джанады.

Джерни тансыкълайд, къучакълайд,  
Джазгъы эртден нюр арады.  
Эки сюйгенни ийнакълайд,  
Сюймеклик джулдуз джанады.

Джашау джолда насыб беред,  
Джанкъылышча, бек тазады.

Къууанч къанатларын керед.  
Сюймеклик джулдуз джанады.

Огъур сезимлени бурад,  
Алтын гюл болуб, чагъады.  
Игиликден толуб турад,  
Сюймеклик джулдуз джанады.

Чокъуракъны тенгизинде,  
Кюнню нюрю джууунады.  
Тюз инсанны джюрегинде,  
Сюймеклик джулдуз джанады.





### Сен ышарсанг

Сен, ышарыб, маннга кьанатынгы кьакьсанг,  
Бетинги кюнюню нюр таяггы джарытад.  
Сюйюмюнгю теге, алтын гюлча, чакьсанг,  
Кьууанч мени джаш джюрегими джашнатад.

Джер юсю сейир тюрсюн алыб, джаз тууад,  
Минги Тау да манга узатады кьолун.  
Кюмюш чучхур джырлай, джагьаланы джууад,  
Сюймеклик кьргюзеди джулдузлу джолун.

Ол, тегерегимде бурулад, ышара,  
Джерге тегюледи, джумушакь нюр болуб.

Суююмлю, кьатымда тураса кьызара,  
Учунама, джюрегим насыбдан толуб.

Ол заманда джашауну сеземе татлы,  
Дунияны ариулугъу кёрюнед меннге.  
Суюмеклик учурады, этиб кьанатлы,  
Ышаргъанынг ушайд табигъатха тенгнге.





### **Сизни бла джашау аламатды**

Сюймекликден толгъан сейирлик кёзле,  
Джарыкъ чача, къууанчха учуналла.  
Гюллю балча, тёгюле татлы сёзле,  
Булутланы, кау-куу этиб, чачалла.

Алагъа аталад тау джыры джелни,  
Алтын Кюн мийикден салам береди.  
Табигъат сюеди кесине тенгни,  
Булбул джыр учады, къанат кереди.

Къызны кёзлери толудула отдан,  
Насыб тауруху алада джашайды.

Джашнатад кьууанч берген толкьунладан,  
Ышанмакълыкъны джилтини ойнайды.

Сёз керек тюлд, ангылар ючюн сизни,  
Кьууанч джууукъду, джюрегим рахатды.  
Сезим хазнам, Кюнча, джылыды мени,  
Сизни бла бирге джашау аламатды.





### Этейик ушакъ

Сен гюллю тауну башына чыкыгъанса,  
Сюйюмюнг мени алгъанд тузакъгъа.  
Джюрек төрюмде, джулдузча, джаннганса,  
Сен учаса, мийикге, узакъгъа.

Ауазынг булбул джырладан татлыды,  
Кёзлеринг ийнакълайла дунияны.  
Сюймеклигинг меннге нюр кьанатлыды,  
Мен да бек сюеме бал уяны.

Сюймеклик гюлюнг аламат чагъады,  
Чапыракъчыкъларын ачыб, джумушакъ.  
Ол джюрегими, джанымы багъады,  
Сен чакъыр мени, этейик ушакъ.



### Джан пёгерим

Гюлча, чагъыб джюрегингде игилик,  
Джашайды, дуниягъа ариулукъ тёге.  
Ашхы иннетинг береди тирилик  
Меннге, анга шагъатды тауда джёге.

Сен, джайгъы Кюнчаса, джаяса къанат,  
Нюр таякъларынг джарыталла мени.  
Джашау джолумда сейирлик, алапат,  
Гокка ханс чагъа къарамынгда сени.

Наныгъы, дугъуму, мени джанымы  
Болгъанса, сен тургъан джерге Кюн тиед.

Сен дарманыса кьанымы, санымы,  
Меннге дженгил джет, джюрегим бек кюед.

Мен кёкюрегингде, гюлча, чагъайым,  
Сен солугъан дарман хауа болайым.  
Ёмюрюнге насыбынгы кьатлайым,  
Мени джан нёгерим, сенден толайым.





### Сюймеклигими джулдузу

Къайда болсам да чакъырады мени  
Сюйген кызым, джылы къучагъын кере.  
Анда кёрюне насыбымы эни,  
Джулдузча, джанады сюймеклик бере.

Сухумда къарайма Къара тенгизге,  
Сейирлик къурагъан кёк толкъунлагъа,  
Джюрегими къууанч байлайды ёзге,  
Бёленеме хурметли муратлагъа.

Сюйген кызымы кёргюзе кёзюме,  
Мен бютеулей толама сюймекликден.

Салама, сезимлерими сёзюме,  
Джюрегим кызыу ура кёкюрегимден.

Таурух ариулукъну теджейме сеннге,  
Абхаз тауладан ёмюрге джёнгерим.  
Тансыкълыгъым джете, алтын тёкген Кюннге  
Салам иеме багъалы нёгерим.

Тенгизни толкъунлары болуб ара,  
Сеннге джырлайдыла джюрек къылларым.  
Кём-кёк чокъуракъ сууну джюзюб бара,  
Сени алгъышлайма, ойнай санларым.

Ала, кёзюу-кёзюу бизни ийнакълай,  
Насыб теджейдиле ёмюрюбюзге.  
Бирге болугъуз! – деб, джылы къучакълай,  
Энчи шыбырдайдыла экибизге.

Кёмюле, чыгъа мен тенгиз юсюне,  
Къулачымы, талпыб ачама кенгнге.  
Къууанчым джайыла дуня джюзюне,  
Ашыгъама, суйгеним, джангыз сеннге.

Сен да мени кемсиз суй ёмюрюнге,  
Джашауунгда эм багъалынга сана.  
Хаманда алыб джюрегинге, эсинге,  
Тыбырымы джарыт, джулдузча джана.



### Эки суйген бирге болуб

Эки суйген бирге болуб,  
Къарай джулдузлу кёкге,  
Джюреклери нюрден толуб,  
Чыгъалла насыб тёрге.

Эки суйген бирге болуб,  
Къышны буралла джайгъа.  
Дарман, гюл хауаны солуб,  
Ушайла Кюннге, Айгъа.

Эки суйген бирге болуб,  
Эшелле насыб чалман.  
Суймекликни бирге къоруб,  
Джанкъылычдан къаратхан.

Эки суюген бирге болуб,  
Сууну ушаталла балгъа.  
Ишни эбин къартха соруб,  
Джашауда баралла алгъа.

Эки суюген бирге болуб,  
Джулдуз джандыралла ала.  
Гардош джыйыб, нартюх оруб,  
Ишлейле урунуу къала.

Эки суюген бирге болуб,  
Тенгизни этелле сай.  
Ала хурметликден толуб,  
Алгъыш этед Къарачай.





### **Бал чучхурунгу тогъуйма**

Мени джайгъы эртденлик къучакълайды,  
Тынгылайма тау шоркъаны джырына.  
Джюрегими, джанымы, ийнакълайды,  
Эс иеме булбулну ауазына.

Мени саулай тансыкълыкъ кючлегенди,  
Аны юсюнден хапар айтыр чучхур.  
Джулдуз, мени джандырыб, кюйдюргенди,  
Сезимлеринги, кесинги бери бур.

Билмей тургъанлай сениге тюбегенем,  
Татлы къучагъында таулу джуртуму.

Ол заман созулсун деб, тилегенем,  
Сенде эди хар джыры умутуму.

Энди сени тылпыуунг бла солуйма,  
Джашнайса, игиликден бютеу толуб.  
Сени мен бал чучхурунгу тогъуйма,  
Джашайса джюрекни джарыгъы болуб.





### Алгыш айтырма санга

Сени бла мен суююб джашарма,  
Кертиге кесими толу бериб.  
Мен суймекликни балын ашарма,  
Къанатларымы насыбха кериб.

Алгъа учунуб, джашау къуарарма,  
Джюрегим, эсим тынчлыкълы болуб.  
Джашау нёгерим, сеннге джырларма,  
Юйюм, юйюрюм къууанчдан толуб.

Терен къайгырыб меннге къарарса,  
Юйде, эшикте этерсе джумуш.  
Ариу чачынгы сейир тарарса,  
Джарыр нюрюнгден тыбыр, юй турмуш.

Джюрек кылынг макъам согъарыкъды,  
Ашхы сезиминг джулдуз джандырыб.  
Хурметинги гюлю чагъарыкъды,  
Тюз иннетингден юйюбюз джарыб.

Сен джумушакъ, татлы сѐлеширсе,  
Огъурлулукъгъа кериб кенг къучакъ.  
Булбул джырлача, ариу кюлюрсе,  
Тау табигъат бла этерсе ушакъ.

Сеннге толгъан Ай нюр тѐгерикди,  
Джулдузла джарыб чыгъарла тангнга.  
Кюмюш Минги Тау салам берликди,  
Алгъыш айтырма кече, кюн санга.





### Сюймекликге хорлатдым

Сейирликди, Кюнча, ышарыуунг,  
Джерни ийнакълай, сабыр атлауунг.  
Сендеди сюймекликни байлыгъы,  
Чокъурагъы, джулдузлу джайлыгъы.

Сеннге деб, булбулчукъ татлы джырлайд,  
Тау аяз ариу чачынгы тарайд.  
Толгъан Ай джаякъларынгдан къарайд,  
Кёз аллымда нюр сыфатынг ойнайд.

Заман озса да, эсгере сени,  
Турама, кертилик бурад мени.

Чучхур суула бла эте ушакъ,  
Джюрек ауазым джырлайд джумушакъ.

Гюлча, ариулугъунга алдандым,  
Кесими суймекликге хорлатдым.  
Энд сеннге тансыкълыкъ мени бурад,  
Джыламугъум джюрегими джууад.





## Гудучу

Сен урлагъанса мени джанымы,  
Джюрюталмайма энди санымы.  
Кёкюрегиме салгъанса тамгъа,  
Сюймекликни буруб кюлкюге, чамгъа.

Сен урлагъанса хур джюрегими,  
Бал татытыб, алгъанса эсими.  
Кетгенсе, сагъышларымы джыйыб,  
От суймеклик бутларымы кыйыб.

Сен урлагъанса бютеу ангымы,  
Ашхы сезимими, сагъышымы.  
Айгъа къарайма, сени сагъыныб,  
Тансыкъ болуб, ахсыныб, сыгъыныб.

Сен урлагъанса мени акъылымы,  
Бютеулей кетериб тынчлыгъымы.  
Кука кёзлеринг джана, ышара,  
Нюр бетингде гюллеринг къызара.

Сен урлагъанса кёб муратымы,  
Кюнюю, кечеми, огъур тангымы.  
Сюймеклик джарытад тау тёппелени,  
Тийдиред джарыкъ джайгъы кюнлени.





### Джаягъынга джаягъымы салайым

Кёкден джудуз алыб берейим сеннге,  
Акъ Айны санайма ариугъа тенгнге.  
Уллу суймекликни кючюн бурайым,  
Алтын Кюн болуб, мен къараб турайым.

Сейир булбулну джырын саугъалайым,  
Сеннге чучхурну макъамын атайым.  
Минги Тауча, бир игилик теджейим,  
Суююм нюр болуб, аллынга келейим.

Насыб кёкню бешигинде бёлейим,  
Тангны джарыгъын саугъагъа берейим.  
Сени джашаугъа нёгерге алайым,  
Джаягъынга джаягъымы салайым.



### **Сюймекликден джаным ауруйду**

Сюймекликден мени джаным ауруйду,  
Къалтыратханлай турад хар санымы.  
Тансыкълыгъымы сакълайды, къоруйду,  
Боркъулдатыб къайнатады къанымы.

Сюймекликден мени джаным ауруйду,  
Сени кѳрмесем кюлген кѳзлеринги.  
Кѳкюрегим, таууш этиб, солуйду,  
Излейди, балча, татлы сѳзлеринги.

Сюймекликден мени джаным ауруйду,  
Меннге бер джюрегинги игилигин.

Къутхарлыкъ къууанчын кенгден тогъуйду,  
Кюсей тюз иннетинги тирилигин.

Сюймекликден мени джаным ауруйду,  
Ашыкъ джаным, къучагъынгы кенг кере.  
Сени сюймеклигинг меннге джашауду,  
Кел, алтын кёгюрчюнюм, насыб бере.





### Джулдуз джанад башымда

Акылымы, сезимими, айтыргъа излеб сеннге,  
Сагъыш эте келе эдим, мен кысхартыб джолуму.  
Билмей тургъанлай, нюр теге джолукъдунг сен  
меннге,  
Джумушакъ саламлашыб, джылы тутдунг къолуму.

Хапар айтдынг, эм сордунг, ышарыб бетинг джарыб,  
Ашыгъышенг, бара эдинг атламынг джел  
къакъдырыб.

Айталмадым иннетими сеннге джууукъ барыб,  
Сюелеем, уялыуну гокка хансын чакъдырыб.

Кеси аллыма сёлеше, келеме мугурланыб,  
Сен да кетиб бараса, къарамайын ызынга.  
Кеси-кесими суймей, ёлеме ачыуланыб,  
Нек ахмадым умутуму? Деб, джюрегим кызына.

Ингирде, ашхамда, кече сагышла бура мени,  
Танг атыб, эртденги болуб, алтын Кюн салам берди.  
Акылынгы билирге мадарла излей, сени,  
Суймеклик бекден-бек кызыб, шынкъарт  
къанатын керди.

Сени излерге амал къатлай, джулдуз джанад  
башымда,  
Мыдах джюрегими басхан булутланы чачаргъа.  
Ёмюрюме нёгер этиб, сени мен джашауумда,  
Экибиз бир юйюр къураб, насыб эшик ачаргъа.





### **Ариулугъунгдан тоймайма**

Джаяды нюрюн Ай бетинг кенгнге,  
Къараб турурум келеди сеннге.  
Ышарыуунг татлыды, джумушакъ,  
Джулдуз кёзлеринг этелле ушакъ.

Сюйюмюнг тёгюлед сыфатынгдан,  
Келеди джылыу ийнакъ атынгдан.  
Ариулугъунгдан тоймайма сени,  
Чыкъмаз тузакъкъа салгъанд ол мени.

Сюйюб джюрегим сени кёргенлей,  
Сезимлериме кирдинг бютеулей.  
Кече да, кюн да, джулдузча, джандынг,  
Сюймеклик чыпчыкъ кенг къанат къакъдынг.



### Атынгы айтама

Сени кѳргенли гюллю ѳзенде,  
Ашхы сагъышла туудула менде.  
Эсим сагъайыб бир тюрлю болду,  
Сени нюрюнгден джюрегим толду.


Бютеу табигъат сеннге къарады,  
Ийнакъ аяз чачынгы тарады.  
Тау булбулчукъ башынгдан джырлады,  
Кюнню нюр джылыуу къучакълады.

Тура эдинг сен, тау гюлча, джашнай,  
Кюн таякъларынг тѳгюле, ойнай.

Сейирлик нюрюнг бетингде джана,  
Сыфатынга чучхурла сукълана.

Хаман излейди сени джюрегим.  
Толгъанд суймекликден кёкюрегим.  
Атынгы айтама, къайдаса сен,  
Ашыкъ джаным, сени сакълайма мен.





## Ышарады сенден Ай

Мен сеннге к̄айгырама,  
Саг̄ышладан толама,  
Хар к̄буру сени излейд,  
Отча к̄ызад джюрегим.

Джудузлаг̄а к̄арайма,  
Мен джолунгу марайма.  
К̄рюн, к̄алайладаса,  
Джанча, татлы н̄герим.

Мен атынгы айтама,  
Тансык̄ болуб к̄айтама,

Кюн ойнайды кёзюнгде,  
Ышарады сенден Ай.

Майны алтын гюлюсе,  
Сен Кавказгъа юлгюсе.  
Булбул джырлайд сёзюнгде,  
Сенде уллуду чырай.





### Джырымы къанаты

Меннге сен тюбесенг къызарыб къарай,  
Джунчуйса, табмайын айтыргъа сёзле.  
Джюрегиме дарман джылыуунг джарай,  
Ийнакъ тегедиле джулдузча кёзле.

Мен айталмайын муратымы санга,  
Турама термиле, узакъдан къараб.  
Сени бла тюшюмде чыгъама тангига,  
Джашайма, джюрегими кылы тараб.

Ышар, къучакълайым, уппа этейим,  
Ойнайды сейир кюч кызгъан къанымда.

Сюймеклик таугъа сени бла джетейим,  
Булбулла джырлайдыла хар санымда.

Кетмейсе эсен, джюрекден ариуум,  
Сеннге аталгъанды къууанч алгъышым.  
Сенде башланады джырда къарыуум,  
Джулдузум болгъанса, ёмюр сагъышым.





### Сюймеклигими булбулу

Меннге къараб джылы ышараса,  
Тюбесем сеннге джашау джолумда.  
Нюрден толуб бетинг, къызараса,  
Сюймеклик гюлле чагъа къолунгда.

Нюр бетингде джулдузла джаналла,  
Ала чырай къоша сыфатынга.  
Таулу чучхурла джырлай агъалла,  
Барыб турурум келед къатынга.

Тау тѣппеледе кюмюш кюзгюсе,  
Насыб хазнаны сен сыйлы хуру.  
Толгъан Айчаса, огъур юлгюсе,  
Татлы суймеклигими булбулу.





### Насыб джулдуз

Келеди санга къучакъ керирим,  
Эринлерингде балча, эририм.  
Тансыкълаб, джумушакъ къучакъларым,  
Ариу айта, сени ийнакъларым.

Мени чакъдырад, джанады нюрюнг,  
Сейир хазнады суймеклик тёрюнг.  
Тынчлыгъым кетди, алдынг джесирге,  
Аллах буюрсун таймай кёрюрге.

Бетинги нюрю джылыта, джана,  
Кюн таякъ бол да мени бла ойна.

Ышарыб, кюлюб, накъырда этиб,  
Насыб джулдузгъа узалыб, джетиб.

Береме сеннге суймеклик гюлле,  
Бизге тийсинле деб, къууанч кюнле.  
Джашайма талпыныб, къучакъ кериб,  
Джюрегими суймекликге бериб.





### **Сюймекликни отунда джанама**

Сюймекликни отунда джанама,  
Сени ариу кёзлерингден.  
Учунама кёушча, кёууанама,  
Балча, татлы, сёзлерингден.

Сюймекликни отунда джанама,  
Таурухлу ышарыуунгдан.  
Сейир чырайынг бла махтанама,  
Кюч алама кёарыуунгдан.

Сюймекликни отунда джанама,  
Джел кёакёдыра барыуунгдан.

Мен тангнга сагъыш этиб чыгъама,  
Тоялмайма къарамынгдан.

Сюймекликни отунда джанама,  
Игилигингден, нюрюнгден.  
Къаламым ойнай, джырлай, джазама,  
Джарытаса джюрегингден.

Сюймекликни отунда джанама,  
Кюмюш Айча, нюр бетингден.  
Башхалагъа сен чыртда къарама,  
Мени кетерме эсингден.





### Сейирлик джайса

Сен джангы туугъан Айгъа ушайса,  
Ариуса, чырайлыса, субайса.  
Сен тауланы джарытыб джашайса,  
Акъ гюлле чакъгъан сейирлик джайса.

Сенде Кюнню сейири ойнайды,  
Акъ чучхурну толкъуну къайнайды.  
Ариу бетинг нюрлю джылтырайды,  
Ауазында тау булбул джырлайды.

Аяз къакъдыра кетиб бараса,  
Тюзлюкге, суймекликге араса.  
Джюрегинг къууанч макъам согъады,  
Насыб джулдузунг джарыкъ джанады.



### **Сеннге атайла джырларын**

Джомакълы Доммай тауладан,  
Исси салам береме.  
Бугъойладан, ауушладан,  
Къараб сени кёреме.

Мусса Ачытарны башы,  
Сени кьойнуна алады.

Накъут-налмазчады ташы,  
Кёз алдай, дуу джанады.

Таурухчады, Бели – Ала,  
Ийне джити джылтырайды.  
Суфруджу кюмюш къала,  
Салкъын аяз къалтырайды.

Мынчакълача, чучхурланы,  
Кюн таякъла ийнакълайла.  
Боркъулдагъан акъ сууланы,  
Буз сюммекле къучакълайла.

Бир-биринден мийик болуб,  
Аждагъанла тизилелле.  
Бары уллулукъдан толуб,  
Къая деуле кёрюнелле.

Сезимлерим ариулукъгъа,  
Джюрегимде уяналла.  
Аламатха, ашхылыкъгъа,  
Сейирликге къууаналла.

Таула истемеге барыб,  
Согъадыла макъамларын.  
Кюн да, мийикден ышарыб,  
Сеннге атайла джырларын.



### Кенг ашхылыкъса

Сен меннге тынгылайса,  
Мен а, джанама.  
Сен ышарыб къарайса,  
Гюлча, чагъама.

Сен татлы сѐлешесе,  
Къушча, учама.  
Уялыб, кюрешесе,  
Къучакъ ачама.

Сен Кюнча джарытаса,  
Мен джылтырайма.

Джаухар джулдуз джандыраса,  
Сени сакълайма.

Таурухчады кюлгенинг,  
Сюймеклигингме.  
Ариулукъду билгенинг,  
Мен сеникиме.

Сюйюм теге тураса,  
Сен багъалымса.  
Джашау джибни бураса,  
Баш муратымса.

Уллуду адамлыгъынг,  
Кенг ашхылыкъса.  
Таурухду дамлылыгъынг,  
Сен алгъышлыкъса.

Тау булбулча, джырлайса,  
Отда кюеме.  
Мен ойнасам, ойнайса,  
Сени сюеме.





## Нюр джанаса

Тансыкъ болгъандан санга,  
Джукъламай чыкъдым тангнга.  
Сени алыб эсима,  
Кюн этерге кесима.

Джырла сеннге аталыб,  
Чыгъадыла къадалыб.  
Учалла джюрек тёрден,  
Салам айталла менден.

Къайнайла сезимлерим,  
Тынчлыкъ табмайд джюрегим.  
Джарыкъ той барад менде,  
Уча, кёрюне кенгде.

Сен кириб джашаума,  
Тыйгыч салыб ашаума.  
Сюйюнесе эсимде,  
Нюр джанаса кёгюмде

Джырлайса, булбул болуб,  
Хур суймекликден толуб.  
Хар тангнга къучакъ ачыб,  
Дуниягъа нюр чачыб.





### Зауукъ эди джашлыкъ

Мен акъылсызма, аны бек сюеме,  
Эсима тюшюрсем, къзыб кюеме.  
Джангы туугъан Айча, эди чырайы,  
Джудузлу, гюллю эди джюрек джайы.

Мен акъылсызма, аны бек сюеме,  
Бирде уруша, кесими тюеме.  
Ётселе да кюнле, айла, кёб джылла,  
Аны унутмайдыла джюрек кылла.

Мен акъылсызма, аны бек сюеме,  
Гокка хансчыкъча, чакъгъанын кёреме.

Хыны кьарамчыгъын бураед меннге,  
Джюрекчигин джабыб, тураед кенгнге.

Мен акъылсызма, аны бек сюеме,  
Джылы сезимими анга иеме.  
Тау гюлчюкню излей джанымы кёзю,  
Сагъына турад алгъышымы сёзю.

Мен акъылсызма, аны бек сюеме,  
Школ джылларыма эсими бёлеме,  
Мыдах сагъышла болсала да аман,  
Зауукъ эди джашлыкъ, сейирлик заман.





### Къызарама аллында

Джылы ышарыб, ийнакъладынг,  
Нюрлю кёзлеринг бла мени.  
Къарамынг бла къучакъладынг,  
Кеталмадым къоюб сени.

Джюрегим чыгъаргъа джетиб,  
Таууш этиб, дюнгордетди.  
Эсим сеннге бютеу кетиб,  
Мени саулай тентиретди.

Сёз айтсам, тилим къалтырайд,  
Къызарама мен аллында.  
Кюн тау башындан джылтырайд,  
Джулдузчаса сен къатымда.



### **Кесинги алдатма**

Сюймекликни джолунда  
Кёб зат кёнделен турады,  
Инджиуню, кыйышлашыуну  
Сюйгенлеге бурады.

Тыяргъа излейдиле  
Буюрулгъан игиликни.  
Къууанчны артха ыхтырыб,  
Унукъдуруб тириликни.

Тюзлюкню кенг, чууакъ кёгюн,  
Къатылыкъ бек басса да.  
Сени джолунгда суймеген  
Зарлыкъ уру къазса да,

Джюрегинг, эсинг къыйналыб,  
Тартса да джылау сырын,  
Санынг джараладан толуб  
Джанынг тыйса да джырын.

Муратынгы къарангы чарс,  
Тубан басыб турса да,  
Акъылынгы, сезиминги,  
Мыдахлыкъ джетиб урса да,

Къабынынг ачы болуб,  
Иннетин джайса уу къуя,  
Сеннге эрши кёрюнсе да,  
Джуртунг, саулай дуня,

Эс ташламай тур, кимге да  
Сен кесинги алдатма,  
Ийнаныб ётюрюкге  
Адам ырызынгы атма.

Иннетинги тюзлей тутсанг,  
Аллахдан саугъа болур,  
Джашау джолунг игиликден,  
Уллу насыбдан толур.





### Джюреклени ачайыкъ

Мен эрийим татлы ийнагъында,  
Бал болуб джайыла къучагъында.  
Нюр кибик, къуюлайым къанынга,  
Исси джюрегинге, хур санынга.

Сени кёрсем деб, кюнлени санай,  
Ариу сыфатынг аллымда ойнай.  
Джашайма, эс ийиб джулдузлагъа,  
Ёлгенлеге, джомакълы таулагъа.

Танг джарыкъда къарай, мамырлыкъгъа,  
Къуунаса, джаным, ариулукъгъа.  
Къарамынг учады чууакъ кёкге,  
Сюйюб ышараса кёксюл чекге.

Талпыб, суйюнюб, биз тюбешейик,  
Керти суймекликни юлешейик.  
Джюреклени киртлерин ачайыкъ,  
Къара тубанны кёзден чачайыкъ.





### Сен къарайса джарыкъ

Джашаялмайма бек тансыкъдан санга,  
Джукъламай чыгъама кёб кече тангнга.  
Джюрегими кёзю суююб къарайды,  
Сейирлик чачынгы къолум сылайды.

Табигъат бла ушакъ этесе сен,  
Суююб къарайма, тау башындан мен.  
Сезим байлыгъым талпыб къучакълайды,  
Сени излей халымы хапарлайды.

Меннге тюбесенг сен къарайса джарыкъ,  
Атламынг учханча, тауда джумарыкъ.  
Мурат этеме сени бла болургъа,  
Суюмекликден ёмюрюме толургъа.



### Мийикге учундурад

Сени кёрсем, кёкден бир кюч келеди,  
Меннге хауа джетмей къалад солургъа.  
Санымы, джюрегими кюйдюреди,  
Мадар излейме, чучхурдан тогъургъа,

Джазыкъсынмай, мыйымы къайнатады,  
Басады, эзеди, ол унукъдурад.  
Кёзюуде, Кюн таякъча, ойнатады,  
Ариулукугъа, мийикге учундурад.

Сейирликни эшиклерин ачады,  
Чакъдырады ашхылыкъны гюллерин.

Джомакъла къурай, мийикде учады,  
Таулада агъарта кюзгю кёллерин.

Мени ышаныу джулдузум джанады,  
Уялыб сорама, къалайды атынг.  
Сюймеклик нюр джангур болуб джауады,  
Экибизни юйюр этсин муратынг.





### Насыб джилтинле

Нюр кёзлерингде джулдузла джаналла,  
Ала, сейир кёрюнелле сенде.  
Башхача айтсам, гюлле чагъалла,  
Ариу джашнайла джууукъда, кенгде.

Алдай кёзлерими, къурай джомакъла,  
Ойнайла, бир-бирин ауушдуруб.  
Насыб джилтинле болгъапла омакъла,  
Тарталла сеннге суймеклик буруб.





### Акъ кёгюрчюнле

Акъ кёгюрчюнле кёкде учалла,  
Ала ышаргъанча, къарайла меннге.  
Кюмюш къанатларын бирге ачалла,  
Джыйыладыла терк, джайыла кенгнге.

Мийикге чыгъыб, энишге тюшелле,  
Эшитилелле къанат тауушлары.  
Ариулукъну кючюн бирден керелле,  
Джылтырайла джулдузлу ауушлары.

Насыб макъамны тоюн къуралла,  
Хурмет, берекет да, уллуд алада.  
Сейир къанатлыла харсны уралла,  
Тепсейле, джырлайла таза хауада.

Бир-бирлерин кьуууб ойнай баралла,  
Джумушакъ тийиб джюрек сезимлеге.  
Ариулукъгъа, игиликге аралла,  
Нюр джаядыла хауа кенгликлеге.

Бири джетиб нёгерин ийнакълайды,  
Кесин, суймеклигин береди анга.  
Ол да бурулуб аны кьучакълайды,  
Дуня таурух кибик кёрюнед манга.

Орнумдан тебмейин къараб турама,  
Кёзлерим чыракъ кетиб аламатха.  
Джюрек джылыууму ары бурама,  
Мен салам бере джашил табигъатха.





### Сюймеклик отда кюеме

Сен кенгнге тау сыртылкъдан къарайса,  
Къууат салыб кюнбетни джасайса.  
Джуртха суююм тѣкгенлей тураса,  
Ашхы сезимлеринги бураса.

Мийик тѣрде, булбулча, джырлайса,  
Гокка хансчыкъ, бюгюлюб, ойнайса.  
Къутас чачынгы аяз тарайды,  
Сеннге табигъат суююб къарайды.

Мен сени къууаныб ийнакълайма,  
Тансыкъ болуб, къаты къучакълайма.

Бютеу сезимими да бурама,  
Кирпик къакъмайын къараб турама.

Гокка хансчыгъым керти сюеме,  
Кёралмай турсам, отда кюеме.  
Сени бла тюшюмде сёлешеме,  
Тюнюмде сезимими юлешеме.

Джаша, къууанчымы нюр гюлюсе,  
Джюрек джырымы сейир кюнюсе.  
Сен джарыкъ Айгъа къанат кересе,  
Джашау джолумда насыб бересе.





### **Кел сен меннге бюгюн**

Кел сен меннге бюгюн, алтын булбулум,  
Джюрегими джарытхан джулдузум.

Кел сен меннге бюгюн, джазгы чыпчыгъым,  
Джылтырагъан, багъалы кюмюш чыгъым.

Кел сен меннге бюгюн, джашау джарыгъым,  
Тенгизде джюзюб ойнагъан балыгъым.

Кел сен меннге бюгюн, Кюнча багъалым,  
Санларымда къайнаб бурулгъан къаным.

Кел сен меннге бюгюн, ышара, кюле,  
Кемсиз суймеклигинг, отча, кюйдюре.

Кел сен меннге бюгюн, кюнюмсе джылы,  
Сеннге аталад джюрегими джыры.

Кел сен меннге бюгюн, бол сайлагъаным,  
Бийчемча, ёмюрюме сыйлагъаным.





### Багъалы тенг

Тансыкъ этдинг, ариу, мени кесинге,  
Сен келесе деб, къарагъаплай турдум.  
Джюрек тёрюнге, ал мени эсинге,  
Сеннге къарамымы, эсими бурдум.

Къууанч тегеди ышарыб кюлгенинг,  
Булбулча, джырлайды татлы ауазынг.  
Джангыз мен болайым сени сюйгенинг,  
Ийнакъласын бизни огъурлу джазынг.

Джулдузча, джарытайым мен джолунгу,  
Насыбымы сени бла кёрейим.  
Сюйюб, тутайым акъ, назик къолунгу,  
Джюрек джылыууму сеннге берейим.

Сен, бал болуб, кьююласа джаныма,  
Дуня сейир кёрюнеди меннге.  
Учунмакълыкъ бересе хар саныма,  
Сени санайма мен багъалы тенгнге.





### Джарыкъ умутла

Джюрек отум джанды, сени кѳргенимде,  
Гюл болуб чакъды, тышымда, ичимде.  
Узакъгъа чачылыб мутхуз булутла,  
Туудула, джулдузча, джарыкъ умутла.

Кѳзлерими сенден аламайма мен,  
Джашауум, багъалы тенгим болдунг сен.  
Къарайма, кирпик къакъмай аламатха,  
Сейирсе, ушамайса сен бир затха.

Къызгъан джюрегими къолума алыб,  
Турама, сеннге берирге уялыб.  
Суймеклик къазаным къайнайды мени.  
Ариу тюрсюнюнгю кѳргенли сени.



## Кёзле

Кёзлерингде джандырыб джулдузланы,  
Сен джарытаса джомакълы тауланы.  
Аладан тёгюледи уллу насыб,  
Турады сени от суймеклик басыб.

Джылы къарайла, къууанч бериб ала,  
Саладыла ашхылыкъдан къурч къала.  
Чачалла, огъурлулукъ, нюр джилтинле,  
Къураб мамыр джашау, къууанчлы кюнле.

Кёзле, къуру ариулукъну ийнакълай,  
Сууаблы ишлени таукел къучакълай.

Кюлелле, адебден, намысдан толуб,  
Керти ишге, тюзлюкге дагъан болуб.

Игилик теджейле кечеде, кюнде,  
Къууанч джаядыла ёмюрлеринде.  
Алалла эрни суймекликде бургъан,  
Тансыкъ болуб, ашыгъыб, сакълаб тургъан.





## Къууанч

Кириш къаядан секире чучхур тегеди таууш,  
Джайгы узакъдан сейир кёрюне, джылтырайд аууш.  
Сюймеклик сингиб, ариу таулу кыз этеди сагыш,  
Къулачын кериб саулай дунягъа айтад ол алгыш.

Кече арада Чолпан джулдузгъа къууаныб къарайд,  
Эртденнге суююне, къутас чачын джумушакъ тарайд.  
Тау булбулчукъ бла тангнга къууаныб ол татлы  
джырлайд,  
Таза хауаны, гюл ийисни да чомарт къучакълайд.

Тауну этегинде кызыл гюл бла этеди ушакъ,

Сюймеклик сингнген джюреги эриб, болад  
джумушакъ.

Бютеу сезимлерин ол джашыртын айтады анга,  
Джанкылышча, джарый салам береди огъур тангнга.





### **Кюмюш шоркъа джырлайды**

Уллу суймекликни сейирлик кючю  
Аулайды бютеулей джерни юсюн.  
Ариулукъ хар заманда джашар ючю,  
Къаты къучакълайды тауун, тюзюн.

Джаз келсе джер джукъусундан уянад,  
Джылы аяз, керпеслениб, ойнайд.  
Табигъат къарыу алады, къууанад,  
Кюмюш шоркъа джырлайды, боркъулдайд.

Суймеклик къулачын ачад адамда,  
Аны игиликге учундурад.

От болуб, джанны джарытады джазда,  
Тюзлюкге, кертиликге да бурад.

Уллу суймеклик, элтед ашхылыкъгъа,  
Сууаб джашаугъа къучагъын кергенд.  
Чакъырад ариулукукъгъа, мамырлыкъгъа,  
Аллах аны бизге саугъагъа бергенд.





### Къарылгъашчыкъла ишлейле уя

Сен меннге тохта, дединг ышарыб,  
Нюрюнг тегюле, бетинг къызарыб.  
Кетме, сабыр бол, бир кесекчик тур  
Дединг, нюр сезимлеринги бери бур.

Мени байлайла джарыкъ сагышла,  
Джюрек терюнгию меннге багышла.  
Къанкъазла да, учадыла бирге,  
Татлы джашау къурайла емюрге.

Таурух табигъат джашнайды бизде,  
Гюлле чагъалла таулада, тюзде.  
Къарылгъашчыкъла ишлейле уя,  
Нюр суймекликден толгъанды дуния.



### Чакъырады джулдузлу аууш

Сейир сыфатынг чакъырад кесинге,  
Урад джюгеннге джюрегим мени.  
Насыблы этерме алсанг эсинге,  
Барырым келед къатынга сени.

Тураса, чырайынг Айча, джарытыб,  
Кюн джылыу тегюле кезлерингден.  
Ышарыуунг, ариулыкъну джашнатыб,  
Къууанч эшитиле сезлерингден.

Джюрек тамырымда къайнайды къаным,  
Кюмюш чучхурча, этеди таууш.  
Меннге тынгыламай тебеди саным,  
Чакъырыб турад джулдузлу аууш.



### Бөлейим сейириме

Тюшюмде сени бла сөлөшиб,  
Чыгъама огъур тангнга,  
Татлы сезимлеге бөлениб,  
Къарайма къуру санга.

Джюрегим сеннге суйюб джырлай,  
Чакъдырад сейир гюлле.  
Умутумда сени бла джашай,  
Озуб баралла кюнле.

Сен болуб насыбым, сагъышым,  
Учаса чууакъ кёкде.

Къууанчым, джулдузум, алгышым,  
Сюйгеним джер юсюнде.

Сюймекликден сени толтуруб.  
Бёлейим сейириме.  
Кече, кюн къатынга олтуруб,  
Джашайым ёмюрюме.





## Унугалмайма

Бютеу эсим сеннге бёлюннгенд мени,  
Джашайма чыггалмайын сагъышдан.  
Сенде эсленеди джуртуму эни,  
Кёз алалмайма сейир таурухдан.

Къууаныб айтама санайма тенгнге,  
Ушайса джарытхан кюмюш Айгъа.  
Джюрегим джырлайды алтыным, сеннге,  
Къууат саласа тау Къарачайгъа.

Таймаздан этесе акъыллы сагъыш,  
Сабырлыса, мамырлыса кесинг.

Ышарыб, дунягъа айтаса алгъыш,  
Джайгъы табигъатха кетиб эсинг.

Мен унутмайма булбул ауазынгы,  
Нюр теге, ышаргъан кёзлеринги.  
Чучхурла джырлагъан гюллю джазынгы,  
Ийнакъ эте, ариу кюлгенинги.





### Джылы къарайса кёзюме

Сен ингирлик бла ушакъ этесе,  
Таурухлу тау джитилеге джетесе.  
Джашайса, джарытыб, Чолпан кибик,  
Адамлагъынг Минги Таучад мийик.

Нюр джаякъларынг кызара келесе,  
Булбул ауазча, джумушакъ кюлесе.  
Сюйюб тынгылайса хар сёзюме,  
Джылы къарайса мени кёзюме.

Нюрюнгю кюмюш чучхуру агъады,  
Аны джагъасында акъ гюл чагъады.  
Ариулугъунг джасайд дунияны,  
Джашнатад мени джюрек уямы.



### Сенсе кюнюм

Сенсе кюнюм, къара меннге,  
Джылыу тѣге кѣзлерингден.  
Насыб келсин, джаным сеннге,  
Меннге айтхан сѣзлерингден.

Сенсе кюнюм, къара меннге,  
Джырлай джюрегинги кылы.  
Мени сана керти тенгнге,  
Сезим кюнчюнг болсун джылы.

Сенсе кюнюм, къара меннге,  
Къууанч джашаугъа барайыкъ.  
Мени сен, сени мен суююб,  
Биз ашхы юйюр къурайыкъ.



### Төгерек чарсдан толду

Джюрегим чырт суймейди сени, деб кюлдюнг,  
Мени мугур этиб, сен саулай ёлтюрдюнг.  
Кёкюрегими мыдах сагъышла басдыла,  
Джарыкъ сезимими асмакъгъа асдыла.

Төгерек къара тубандан, чарсдан толду,  
Джарыкъ кюнюм, къарангы кечеча, болду.  
Элия чартлады, урду джюрегими,  
Джыламукъла джуудула нюр кёзлерими.

Къая оюлгъанча, кёрюндю тюнюмде,  
Сарнагъан тауушла эшитдим тюшюмде.

Ачы хапар айтады кьулагъыма джел,  
Бушуу этеди, таулу джуртум, сахар, эл.

Сени джюрегинги хорлайды джангылыч,  
Нек тас болуб кьалдынг таурухлу джангкьылыч?  
Анга кьыйналадыла мийик ауушла,  
Сериуон учадыла, ётгюр тау кьушла.





## Учунама мен

Сен мени джюрегими гюлюсе,  
Сюймеклигими джазгы кюнюсе.  
Сезимими таркъаймаз байлыгы,  
Насыбымы сейирлик джайлыгы.

Сагышым кюнюш чучхурдан толад,  
Сеннге излемим накъутлу къалад.  
Кёрюрге талпыб, учунама мен,  
Ашыкъ, таукеллениб, аллыма сен.

Къарамыгда кюнюш Ай джылтырай,  
Алтын джулдузла башынгдан къарай,  
Джомакъгъа ушайса, сен аны бил,  
Джюрегими джашнатыб тургъан гюл.



## Сени кёрсем

Сенсиз мени чыгъанакъла басалла,  
Сени кёрсем, ариу гюлле чагъалла.

Сенсиз джыламукъ сууларым агъалла,  
Сени кёрсем, кёзлерим нюр джаналла.

Сенсиз, мен шош, мыдах кёллю болама.  
Сени кёрсем, насыбымдан толама.

Сенсиз зыгъырлы тауча, оюлама,  
Сени кёрсем, чучхурча къуюлама.

Сенсиз къарангыды, джокъма, ёлеме,  
Сени кёрсем, нюр болуб тёгюлеме.

Сенсиз учхарады, къарыусуз болум,  
Сени кёрсем кюн тийиб джарыйд джолум.

Сенсиз джюрегим таралыб джылайды,  
Сени кёрсем, къууанч басыб джырлайды.

Сенсиз бутларым джюрюмей тохтайла,  
Сени кёрсем, тепсеб, ойнаб башлайла.





## Саугъа

Исси Кюн джюрекни джылыта турад,  
Кече да, кюн да суймекликни бурад.  
Аны мамыр джашаугъа къаратад,  
Джерни юсюне къууанч орнатад.

Суймеклик, джанкъылышча, ойнайд,  
Боркъулдагъан чокъуракъча къайнайд.  
Ол, къанат бериб, учурад мени,  
Сейир кюч бла ийнакълайды сени.

Ол, накъут-налмаз болуб, джылтырайд,  
Меннге татлы сёзлени шыбырдайд.  
Игиликни джилтинлерин чачад,

Насыб джолну эшиклерин ачад.  
Игиге ийиб акъылын, кючюн,  
Джерни юсюнде тюз джашар ючюн.  
Адамгъа, сууаб этсин деб, саны,  
Аллах саугъагъа бергенди аны.





### Сыйынг джайылсын кенгиге

Мамырлы болсун тюшонг бла тюнюнг,  
Хурметни джазыча чакъсын хар кюнюнг.  
Ауазынг къуру да татлы джырласын,  
Бир Аллах суймеклигинги сакъласын.

Нюрюнгю чайкъалсынла толкъунлары,  
Сеннге аталсынла булбул джырлары.  
Джарыкъ тѣксюнле насыб джулдузлары,  
Эрисинле джолунгу гыйы бузлары.

Бар алгъа, джашауунгу кючюн къура,  
Ашхыгъа, кертиге кесинги бура.

Сеннге къуру да игилик тюбесин,  
Къарнашлыкъ, шохлукъ терен бёлсюн эсин.

Билиминг, тенгизча, бек терен болсун,  
Акъылынг, иннетинг тюзлюкден толсун.  
Хар сезиминг, этген ишинг джарысын,  
Халкъынгы махтауу сеннге джарасын.

Хурметинг къанатларын, къушча, керсин,  
Адебни, намысны хазнасы келсин.  
Махтауунг джайылсын мийикге, кенгнге,  
Адамла кёб алгъыш айтсынла сеннге.



## Башлары

«Акъ Минги Тауну эни...» .....	3
Ариулукъ .....	10
Сюймеклик – сейир нюрдю .....	11
Аулайды бютеу Аламны .....	13
О, Сюймеклик! .....	14
Сен алтын Кюннге ушайса .....	16
Сюй мени .....	18
Кюнюм, Айым .....	20
Къууанч тегюледи .....	22
Ариуума .....	24
Мени чакъыраса .....	26
Кюледи гюлчюк .....	28
Насыбдан толтурайым .....	30
Сюймекликни хазнасы .....	32

Хурметинг суйдюреди .....	34
Сайлаучуну аякълары таядыла .....	36
Джашау байлыгъым .....	38
Уяла къарайса .....	40
Сени юсюнгден сагъыш этеме .....	42
Къаты къучакъла .....	43
Сюймеклик джырыса джюрегими .....	45
Сир къатама аллынга .....	47
Ай бла джулдуз .....	48
Мени джюрегим къууанады санга .....	50
Джулдуз бла Ай .....	52
Сюймекликни аркъаны мени тутад .....	54
Къарны эритеди тылпыуунг .....	56
Юйюнгю дагъаны болайым .....	58
Ай бла шоркъа .....	60
Учарым келед .....	62

Сейирди бютюн .....	64
Сюймеклик ушакъ .....	66
Алтын джудуз .....	68
Сен келсенг .....	70
Эсим сеннге бёлунеди .....	72
Джанкъылышча кёрюнесе .....	74
Кел! деб, сен мени чакъырсанг .....	76
Атынгы айтама .....	78
Меннге къууанч бересе .....	80
Сюймесенг, аллыкъ тюлме мен сени .....	82
Уллу Аллах саугъалар экибизни .....	84
Меники тюлсе, деб ахсынама .....	86
Джомакълыкъны чархы .....	88
Сюеме мен сени .....	90
Бизге игилик атайды джырын .....	92
Къууан меннге тюбегенинге .....	94

Къатынгдан кетерим келмейди .....	96
Сюйюмлю кёзле .....	97
Ариуса .....	99
Терекчик сеннге чакъырыб турад .....	101
Бир-бирибизге къучакъ керейик .....	103
Сагъышымы чач кенгнге .....	104
Джюрегим излейди суйюб .....	106
Суймеклик джулдуз джанады .....	107
Сен ышарсанг .....	109
Сизни бла джашау алааматды .....	111
Этейик ушакъ .....	113
Джан нёгерим .....	114
Суймеклигими джулдузу .....	116
Эки суйген бирге болуб .....	118
Бал чучхурунгу тогъуйма .....	120
Алгъыш айтырма санга .....	122

Сюймекликге хорлатдым .....	124
Гудучу .....	126
Джаягъынга джаягъымы салайым .....	128
Сюймекликден джаным ауруйду .....	129
Джулдуз джанад башымда .....	131
Ариулугъунгдан тоймайма .....	133
Атынгы айтама .....	134
Ышарады сенден Ай .....	136
Джырымы къанаты .....	138
Сюймеклигими булбулу .....	140
Насыб джулдуз .....	142
Сюймекликни отунда джанама .....	144
Сейирлик джайса .....	146
Сеннге атайла джырларын .....	147
Кенг ашхылыкъса .....	149
Нюр джана .....	151

Зауукъ эди джашлыкъ .....	153
Къызарама аллында .....	155
Кесинги алдатма .....	156
Джюреклени ачайыкъ .....	159
Сен къарайса джарыкъ .....	161
Мийикге учундурад .....	162
Насыб джилтинле .....	164
Акъ кёгюрчюнле .....	165
Сюймеклик отда кюеме .....	167
Кел сен меннге бюгюн .....	169
Багъалы тенг .....	171
Джарыкъ умутла .....	173
Кёзле .....	174
Къууанч .....	176
Кюмюш шоркъа джырлайды .....	178
Къарылгъашчыкъла ишлейле уя .....	180

Чакъырады джулдузлу аууш .....	181
Бөлейим сейириме .....	182
Унуталмайма .....	184
Джылы къарайса кёзюме .....	186
Сенсе кюнюм .....	187
Төгерек чарсдан толду .....	188
Учунама мен .....	190
Сени кёрсем .....	191
Саугъа .....	193
Сыйынг джайылсын кенгнге .....	195
Башлары .....	197

Хусеин Узеирович Лепшоков

## **Белые голуби**

Лирические стихи на карачаевском языке

**Редактор** – М. Х. Чотчаева, зав. кафедрой литературы  
КЧГУ, к.ф.н., доцент

**Корректор** – З. И. Лепшокова

**Компьютерная вёрстка** – Т. А. Кахунова

Китабда суратла авторнукъуладыла

Подписано в печать 19.02.2014.

Формат 60x84<sup>1</sup>/<sub>16</sub>. Гарнитура «Times New Roman».

Бумага офсетная. Печать офсетная.

Усл. п. л. 11,85. Тираж 500 экз. Заказ 27-2014.

Отпечатано в полном соответствии с качеством  
предоставленного оригинал-макета.

ИКО «Аланский Эрмитаж»

369000, КЧР, г. Черкесск ул. Чкалова, 17а

Типография ООО «Нартиздат»

г. Черкесск, ул. 1-я Подгорная, д. 2



**Хусеин Лепшоков – народный поэт Карачаево-Черкесии, автор 12 книг.**

**Он относится к поэтам, чьи души тонкого лирического склада. Хусеин Узеирович служит прекрасным идеалам чувства любви и дружбы, верности, честности, порядочности, добра, справедливости и красоты. В нём горит звезда любви ко всему живому.**

**В своей новой книге «Белые голуби», которая состоит из 101 стихотворения, поэт воспевает верную, прекрасную, горячую, настоящую любовь.**

ISBN 978-5-906148-08-7



9 785906 148087